




97.451
5389
:54

留溪外傳





留溪外傳卷十四

貞孝部


蔡孝女傳

蔡孝女蕙泰州人父某生子女五人蕙獨居長有至性自幼知服勞奉事承父母權既長通女誠女訓女孝經許字同郡明經繆許未嫁父被吏議當棄市蕙即絕嗜味屏服飾夜不解衣焚香籲天為父請命如是者四年如一日嚴寒大雪中風鳴鳴四面入蕙不設鑪火苦塊自如許度外舅不可活欲迎蕙歸蕙揮涕謝媒氏曰父亡與亡曷忍言其他己巳春

今上復幸江南蕙嚙指血草狀匍匐以訟

上曰是女子也而為父乞命嗟歎久之有司以為緹縈復生也其父由此得平反蕙歸許未一年而病卒

外史氏曰方蕙父之被收也人或以為當死余心竊疑之其父之為人果若緹縈之父為吏齊中皆稱廉平否歟書曰與其殺不辜



盜失不經此

聖天子經天下之心也且蕙者以孱弱女子不憚艱難而匍匐爲父上書則自有書契以來不可多見者矣可不謂之孝歟

沈孝女傳

孝女錢塘處士沈人驥女仁和諸生陸有奇妻也幼性孝數歲事二親能盡道定省溫清禮踰成人家人咸呼爲女孝子及笄歸于陸以婉順稱尤能善事舅姑舅姑稱之曰賢旣而內外皆無閒言未幾母周疾文歸省侍湯藥歷數月疾不起女泣禱于天曰父老矣弟且幼母不可以死天乎無寧死我以代之夜夜如是而疾益篤醫者不治且曰精神脫矣臟腑敗矣氣血竭矣將安治爲秋分必殆至期疾果劇女卽持利刃潛割臂肉作羹以食母母食疾卽愈而女創甚流血不止越十二日而死年十六武林人哀之爲詩文弔者以萬計

外史氏曰割臂本非中道韓子譏之當矣故

國家之制不列旌典恐其殘遺體博孝名耳然婦人女子知有父母而不知有身皆出其真心勃發而不可遏者也夫奮不顧身以求免親于死平居必不薄待其親矣較之外飾細行邀虛譽于天下而真心不可問者何啻霄壤哉故雖不得中道而其心可嘉也

鄭孝婦傳

孝婦胡氏武進前丁丑進士山東布政參議鄭醇曾孫處士鄭士晉妻前禮部尚書胡忠安澗之曾孫女也天性溫淑自幼卽能以禮自閑數歲家人咸以女君子目之及笄歸鄭以無違稱事舅姑篤于孝凡一飲一食必親必謹不肯假手臧獲處妯娌藹然若同懷姑朱患篤疾久不能起婦侍湯藥扶臥起晝夜不解衣不交睫者歲餘如一日病劇卽向隅涕泣或焚香禱天請以身代姑嘗夜半呼所需婦無不卽應姑曰新婦何竟不寢耶長久如是豈鐵漢耶婦曰姑當病劇兒何心能寢卽寢又焉能合目故不如無寢也姑歎曰有婦如此吾無以報但願孫新婦亦如新婦孝順新婦耳

後姑病瘳而婦以服勞過竟早卒其姑痛哭曰嗟乎天乎何奪我
孝婦之速乎哀哉涕泣歲餘目遂瞽然壽至九十方卒而孝婦死
年才二十又九其子朝紳以文學顯而性孝痛母早歿每對人輒
垂涕士君子哀之多贈以詩文焉
外史氏曰武進吾郡附郭邑也去余邑不及百里余姻婭多居之
過余者輒道鄭氏婦之孝所以不享壽考爲恨嗟乎孔子云朝聞
道夕死可矣夫不聞道活百歲非壽也今鄭氏婦以孝死是聞道
者矣齒之短長烏足論哉

王孝婦傳

王孝婦高氏四川仁壽人幼貞淑及笄字同里諸生王楷楷少有
膂力善擊劍張獻忠亂蜀率鄉眾與戰沒于陣楷與婦同年月日
生聲音狀貌甚相類婦嘗戲服楷巾衫坐書舍呼童子供役童子
以爲郎君也及楷死婦年才十八父母宗族俱死于賊婦匿深山
得免然家破亡無所依或勸之嫁婦曰此豈好女子所爲且吾舅

姑俱宦閩世爲巴蜀簪纓豈可自我墮家聲乎乃纏金珠易男子
服戎裝佩劍乘馬作督郵狀冒其夫名竟出蜀關抵夔州賣馬買
舟汎江從鄱陽入閩關抵建州時舅爲永安令入見舅姑舅姑以
爲兒子來也皆大說婦恐傷舅姑意僞應之姑問其婦安在對曰
賊殺之矣姑大慟婦亦泣下旣而舅卒于官閩亂婦奉姑隱山中
事之甚孝姑屢病乏醫婦屢割股愈之乃至兩臂無肉姑欲爲之
娶婦婦泣曰我非兒子乃新婦也姑始悟乃大慟姑死婦哭曰我
之不死者以舅姑在耳今舅姑旣沒尚欲何生旣殮卽縊死于棺
側

外史氏曰王氏婦可謂節孝而擅膽略矣觀其子然一身走數千
里以依舅姑丈夫所不能乃區區一女子能之世可多觀哉

陳孝婦傳

孝婦許氏江陰聞韶里陳永祚妻也性孝數歲母疾嘗終夜徬徨
不寢父命之寢女曰母疾篤兒心碎矣安能寢父奇之旣長貞靜

沈默言笑不苟及笄字永祚以孝順稱姑暴稍不如旨輒撻之流血婦婉容愉色下氣怡聲順承之姑終不說也姑有疾婦終夜不寢侍立榻前雖漏盡一呼輒應經旬累月未嘗或倦姑躁病久必發狂狂則必撻婦動以百數婦輒跪受每病一發婦非頭顱破則肩臂腫或面目青紫人見之多為不平婦曰姑病耳非病肯若是哉進湯藥稍不合姑輒大怒令婦長跽牀頭不命起不敢起姑待婦最厲終姑世婦當其前未嘗或一坐罵詈楚未嘗一日閒飲食未嘗一日飽體膚未嘗一日完然其事姑也每夜必三更乃寢雞一鳴則起盥沐櫛髮伺姑于寢門外矣年三十六以產卒外史氏曰孝婦遭姑楚有鐵石人所難堪者而彼竟甘之如飴絕無幾微怨辭此讀書明理君子所難能者也然竟以早卒嗚呼悲哉

李孝婦傳

李孝婦失其氏儀真人幼端淑性孝善事父母年十五歸于李李

力田婦能佐夫耕舅早卒事孀姑極其婉順姑有心疾每病劇輒死去半日乃甦一月閒嘗發數次每次必三四日夜乃少閒閒一二日復病婦叩頭流血搶地呼天請以身代乃至欲殺欲割終不得愈每方外人過婦輒予之齋再拜求其善方而方外人多恟怩不經雖得方以百數卒不效婦以事益憂之他日夫耘于田而姑忽病發呻吟輾轉牀第閉婦心如刀刺突有一黃冠客造其廬求食婦曰食易耳奈吾姑病劇何黃冠曰若姑何疾吾能治之婦大喜斂衽再拜告以故遂治飡食之黃冠曰是疾易療耳然非活人肝不可也婦益喜即持刀剖胸割肝與之黃冠即雜以他藥令烹之進姑姑食畢而脫然無恙矣婦以創故昏仆于地黃冠驚而走日昃夫怪其不來餉也馳歸知婦割肝急市藥敷之數日而創合後婦年九十餘無疾而卒其後有吳氏吳氏者泰州安豐亭民魯高妻也舅病篤夫亦病婦引刀刺股肉為羹雜糜以進舅舅食即愈而婦以刃利切骨流血四十二日而卒里人哀之

外史氏曰孝哉婦也惟知愈舅姑疾而忘體膚之楚推其心自足感天地格鬼神矣然李以壽考而吳卒以創死殆有幸不幸耶

周孝婦傳

周孝婦黃氏陝西三原人也性孝垂髫事孀母能盡道及笄字同邑周讓侯以恭順稱讓侯家貧遠館涇陽常經年不歸婦力績以奉養姑姑老有痼疾每病必數日夕婦每夜必擁姑坐于牀常經旬不交睫一呼必應他日姑病劇婦搶地呼天禱北斗請以身代不愈婦心如刺情鄰媪徧求良方皆不效聞城西郭某良醫也然驕貴不易致婦卑辭頓首于鄰叟求往延之既至視脈曰不可治矣如糞苦尚有一綫也婦即嘗之味苦夫喜以告郭曰非牛黃不效時黃價八十值小民家不易得婦盡脫簪珥及嫁時衣具算十值昇郭易黃食之不效婦親詣郭頓首于其門求再一視郭固拒

不往婦涕泣以歸無他策惟稽顙竈神求代姑死病益劇僅一息矣婦乃操刀割股作羹以進姑食已病少甦婦復割以進病漸閒

婦大喜再割進之病遂愈然婦以三重創故又兩月餘不寐竟病數月而死年十七

陸孝女傳

陸孝女江陰由里山人前朝萬曆閒坐虎皮講周易瓊臺先生之族孫女也性孝七八歲即知溫清之義及笄許字同里陳氏子未

結褵值鼎革

大兵圍城游騎略山中入其家父兄持戈與鬪格殺數十餘騎騎士怒併力攻殺其父兄其母揮大斧奮勇斬三騎士爲亂箭射死騎士見女美且豔欲汙之女從容告曰母倉忙也妾願從將軍行騎士大說挾之歸抵壘置酒邀同人痛飲喜得女也盡酣乃散騎士將就寢呼女女復從容告曰母倉忙也姑少待騎士先就枕以醉故即斲然女乃抽其利刃斷其頭驚鄰幕士倒屣來視甫入女

卽揮刃斬之益驚眾皆來視倉卒不知所爲不及備女揮刃連傷五六人一軍皆驚疑爲劫營者大呼自相殘殺至夜半女卽自剄而死年十八

外史氏曰鼎革之際予邑以抗

命故城中十六萬人皆授首女子投井投河自剄及舉火自焚死者不可勝數陸氏以孱弱女子當戈戟擾攘時不動聲色從容不迫爲父母兄報讐以死可謂孝且烈矣

許孝婦傳

許孝婦陳氏山西平陽人幼有淑德讀書通女孝經列女傳諸書及笄適同郡許綱諸生也以力學故得疾結禡未一歲而卒無嗣別無昆季遺產數千金族人名寧者富而暴垂涎之屢請其舅求爲嗣舅曰吾自有嫡族不許寧怒袖大鐵錘擊殺其舅其姑訟于官寧賂官置于獄瘐死婦大恚欲與寧甘心而未得聞也乃謀于族得應立子方十歲寧又密使人鳩殺之婦乃重賄購一刃利可

斷鐵藏于室佯謂人曰吾昔誤聽人言不立寧而立他子寧合爲吾子但吾少而寧長不可稱母子寧益使二孫事吾彼別居以掌吾財可耳寧聞之大喜果使二子來事婦愛若己出久之寧不疑過其家索文簿婦盡出與之且飲之飲盡酣而去他日婦誕辰置酒大會宗族閉其二子于室婦懷刃出堂上立斷寧頭入斃二子于室自詣吏寧嗣絕吏盡斷其產歸婦爲擇應立者爲後奉婦終老

外史氏曰古來節烈婦人多矣未有若許氏婦能爲舅姑報讐從容手刃讐人于尊俎間可謂孝且勇矣

李孝女傳

李孝女江寧鄉人父某賈人也積貲數千金往來販貨江上有年矣他日載金汎舟至無爲州貿易爲大盜截于江殺而盡奪之計聞女號慟呼天曰妾無兄弟願天佐妾報父讐母亦以哭父死旣葬女遂渡江至無爲訟于官盜聞之厚賂津要以勢壓州牧竟寢

其事女忿之欲自殺于州庭夜夢其父告曰殺我者越人陳耀祖及其僕張智勝萬啟也可往北城訪之明日往訪果有其人以貨為郎交結要津守令直奴隸耳女思不能敵乃薙髮易男子服變姓名密合冶人鑄一利刃伏衣襟中求備盜家甚勤慎久之盜愛焉乃得入臥室見故父所用器皿具在傷心慘目輒咽淚不止又度力弱不得開不敢輕舉至除夕盜與僕痛飲皆大醉女乃出刃殺張智勝萬啟方入室殺耀祖驚其妻拒門大呼不得入耀祖獲免明且自詣獄陳狀有司終患諱盜之罰不直其事女乃自殺年十九

外史氏曰孝女為父報讐巨魁雖漏網然已殺三盜矣嗚呼賢于男子遠哉

孫孝婦傳

孝婦淮安府順治甲午舉人潘取臨女高郵州丁酉孝廉孫弓安妻也幼讀書通大義事二親能以道及笄歸弓安以恭順稱姑早

卒奉事其舅如事父姻婭皆稱之曰孝舅宗彝丁亥進士以薊州副使告歸性耿介尚氣節居鄉勇于為義然疾惡太嚴以是小人多惡之時治河諸吏多侵蝕工帑派役里民間多苦累宗彝輒走白當事羣吏多銜之會當事以淮黃水洩注秦郵湖高寶興泰民慮有魚鼈患皆譁宗彝又持論不可小人乘隙遂造蜚語中傷當事誤聽置之獄婦脫簪珥貨妝賂胥吏以求脫其舅不可得遂乃棄鉛華臥苦塊搶地呼天稽顙北辰以求脫其舅又不可得遂屏腥食長齋繡佛刺舌血書金剛經如千卷以求脫其舅終不可得郵人素德宗彝又感婦孝父老子弟數千人及諸生數百輩走當事號泣呼天叩頭流血以求脫其舅又不可得而卒于獄婦呼號悲痛不食者累日夕三年喪哭甚哀後當事聞之感悟深自悔欲提殺讒者以謝而未果云

外史氏曰世之男子惑婦人不能善事父母者多矣至婦人以孝舅姑稱尤難屈指孫氏婦當舅被難自媿不能效緹縈上書天子

前以雪舅冤乃至欲生不得欲死不得輾轉呼天求天而天不應不得已刺血書經以希一誠之格而天究不可問然其心良苦誠為古昔鮮見者矣良由

今天子以孝治天下故閭門之內皆能以孝自勵語云道之以德四海胥化誠然乎哉誠然乎哉

張孝女傳

張孝女陝西鎮原人性孝善事父母父某為讎家所殺女有三弟皆幼不能報即毅然走訟之令令受讎家賄不直其事女走愬郡守下其狀于令值李賊圍郡城令又寢之既而郡城陷令降賊為賊郡司馬新令至女又訟之讎家又賄新令寢其事竟不得白明年李賊陷燕京未幾我

朝定鼎

王師追賊至陝女聞

大兵至即薙髮易衣冠詣師中投軍帥偉其貌試之弓馬皆中式

授為忠顯校令率五百人先驅女得賞賜盡給諸軍軍士大說皆願為死既定西安女言于帥曰鎮原里也道路山川素所熟察請帥一軍往略之帥允之升為武毅將軍女乃率士抵鎮原貪令開門降即圍讎家無老少皆斬持其頭泣祭父冢畢歸拜其母曰兒之偽勇從戎者為父讎也今讎已復吾志已足如反妝字人誰其信我乃自殺年十九國人哀之為之立孝女祠以春秋祀焉外史氏曰此天下奇男子也孰謂巾幗哉觀其一死自明有戰國烈士之風焉噫偉矣

黃孝婦傳

黃孝婦蔣氏河南真陽人數歲即能孝事二親垂髮里中即有女孝子之稱蓋母病篤曾割股以愈之也及笄歸同邑黃氏子尤能孝事舅姑婉容愉色怡然一孝子焉敬其姑特至姑長病三年婦事左右未嘗一交睫至漏盡呼無不應凡六割股病始小愈姑憐之慰婦曰新婦侍我病久矣未嘗一就枕焉即鐵鑄者亦當銷滅

況血肉軀乎今我少閒益少息也婦對曰新婦慣之矣昨見姑稍愈喜欲求一寐奈目不瞑何姑母以新婦為憂也又三年姑病方大瘳而舅又疾作婦事之如姑舅病三年乃卒婦哭之慟姑慰之曰汝九年不寢矣吾觀汝容色雖未憔悴而精神則索然矣若不自保豈能久乎是欲速我死也婦乃稍解未幾姑又以疾卒婦晝夜號泣至失聲而病不起矣計婦年十九臘月而嫁明年正月而姑病繼之以舅共九載未嘗與夫有枕席之權而死無出年二十有八

外史氏曰嗟乎嗟乎孝婦之孝古今人所不能也九年不寢真鐵漢哉其精神與天地爭長久矣

吳孝女傳

孝女者歙縣莘墟里國學生吳曙星女也初生母黃即喪撫于庶母高幼有至性數歲人或言非高出者知母早歿即呼天號慟每逢春秋祭祀宛轉悲嘯既長繡窗風雨時追念其母往往咽淚吞

聲欷歔垂涕事父益謹夙興夜寐朝定夕省無敢或怠嘗曰吾不能生奉母一日悠悠蒼天終恨何極今若不竭力以事椿庭一旦梁頹木壞則兩失之矣何以生于天壤哉于是家人皆稱其能孝而宗族俱以女孝子呼之及笄字巖鎮郡庠生鄭晉德晉德父乙未進士名嗣武號有懷登第後即與妻程偕隱不仕晉德奉之甚孝婦體夫志事舅姑能盡道舉四子曰哀曰衰曰衰曰衰俱長而女垂四十矣父年七十有七病墮甚篤水漿不得下者經旬女侍湯藥晝夜不怠既而醫者皆曰不治女捨地呼天稽顙北辰求以身代不得聞乃泣禱神祇持利刃剖股肉和藥以進父服即愈其孝感如此後父卒女終歲悲哀竟以哭死疾革時孟仲叔三子同日割股而季以年稚未能勝任亦同日割股人以為孝德之感云郡守張登舉通判鄢翼明皆以女中曾閱旌之載入邑乘外史氏曰人少則慕父母既長為外物移則衰吳氏女年四十父病則割股以療父沒則悲泣以死嗚呼有終身之慕矣


羅孝婦傳

孝婦歙縣前明經授推官吳鼎女南昌縣官生授知縣羅光怵妻也幼有淑德事父母能盡道數歲卽通詩書大義祖應蛟前鴻臚丞國變後父子隱居揚州以俠聞四方賢豪多歸之順治甲午光怵父少詹憲汶棄官僑寓江寧過江都得交應蛟知其女孫賢遂締婚年十六歸光怵以恭順稱尤能善事舅姑姑劉恭人絕愛之如己產嘗顧左右歎曰此吾家賢婦也惜神氣差薄不永祿耳庚子姑病親治湯藥晝夜侍左右歷數月罔怠及篤卽焚香禱天願減年以增姑算不瘥輒封股肉雜藥以進姑飲覺甘香殊他味病爲少閒當溽暑不數日而創自合若有神佑也辛亥聞舅疾于故里卽齋禱天地祈益算及舅姑歿三年喪無日不哭極哀也鄰里爲之垂涕孝婦舉男子子四女子子四男子子皆歿孝婦痛其子而歿年三十有九

外史氏曰婦道難矣今之世求其善事舅姑者指不可多屈羅安人割股以療姑疾禱天求益舅算余亦偶聞之耳可謂善人矣何乃竟不克以老壽終耶豈天之報施善人當如是者耶



留溪外傳卷十四



留溪外傳卷十五

貞烈部

陳烈女傳

陳烈女名冬青和州人也幼聰慧八歲通烈女傳女孝經讀書每讀節烈故事卽感愴流涕慨慕不已家人卽識其他日必能以節烈著也及長許字同邑黃某未歸而黃某以疾卒冬青哀慟不欲生請奔喪父母不許久之欲以女他適冬青聞之泣告曰願往省舅姑了兒心事則可矣又不許乃以死固請許之于是遂縞衣裳以往泣拜堂上請就舍願事舅姑以終老舅姑不可乃作書辭父母曰竊聞婦道從一而終故一與之盟終身不改昔之貞女烈婦比比皆然是以千載之下猶能爲父母榮也兒生不辰痛壻早歿雖未奉箕帚于生前然媒妁將命父母許之六禮旣成久矣爲黃氏婦矣奈何壻死而有他心焉此兒之恥也終身不改之謂何兒不死辱父母重矣兒今日願從壻于地下以爲黃氏鬼幸毋以兒

為念也乘閒竟縊死與夫同穴焉
外史氏曰烈女輕生重義不辱父母矣或曰女未廟見不得稱婦
冬青可以無死嗚呼率土之濱莫非王臣如以未委贖而藉曰非
吾君也可乎

崔烈女傳

崔烈女者泰州富安亭民崔健玉女也幼失母事後母能盡道許
字同里王嘉誨嘉誨任俠好客家千金悉揮散貧不能娶烈女兄
弟四人三弟皆幼父病析產授烈女田為匱賞既卒二伯暴垂涎
之百計困三孤及烈女去烈女可盡吞其產也而嘉誨又無力迎
二伯因使人諷烈女他適不聽竟以烈女改許富兒納其重幣迎
有日矣烈女聞之泣告後母曰王氏之婚先人許之奈何先人肉
未寒而伯氏利吾財欲棄先人盟傷先人心于地下兒誓一死不
負王氏約乃伏利刃于衣襟曰敢有言他者吾拌與之俱死富兒
聞之懼不敢來迎烈女乃密遣老嫗言于姑曰伯氏無良欲棄宿

約兒知夫子貧敢以貲相助幸母緩也嘉誨因擇吉親迎二伯知
之恚摭他事訟嘉誨于州嘉誨奔愬郡守二伯乘嘉誨在官謬謂
所許富兒曰親已毀可急來迎烈女聞之遂投繯死年二十四
外史氏曰今之讀詩書者動以禮義自許及其趨利也如鷺先儒
云與之一錢即亂况富貴乎崔氏守從一之義不以貧富易志甘
心一死賢于讀書者遠矣

高烈女傳

烈女江陰鳳凰山世農夫高鳳之女也年十二即擅儀容性端莊
言笑不苟里中每有春秋社會之聚鄰家姊妹莫不明妝豔服趨
觀恐後女則閉戶紡績未嘗履闥一窺于是閭巷老幼男女皆目
之為迂號曰迂夫子姑娘又曰應頭巾阿姐不二年迂夫子姑娘
之名腐頭巾阿姐之貌共聞于一邑求之者十皆不兆惟南鄙窶
人子朱鑲筮吉焉時高族有名世勳者世為狙獍工于詔笑與東
山世富翁兒陳某友善富兒愚而不文無以取榮鄉里且累代放

利鄉人多怨苦屢侮于土猾世勳為謀輸粟入太學又令重賄為其弟聯婚貴族于是富兒出入乘輿張蓋交結官吏聲勢傾一方而莫敢仰視者世勳又為大言誇駭田夫牧豎曰此子也才取朱紫指顧耳若等善事之母賈禍于他日也山中人每見其門冠蓋相望固已搖首咋舌及聞是言益悚懼而莫之敢撻富兒深德之康熙丁卯例當貢舉乃憇懇富兒輦金赴試貢緣科目不得遂偕眾毀榜當事奏聞

詔下有司捕治富兒懼不敢寧居隱世勳家世勳山居去城邑遠且充撫軍門胥吏不敢詰故恃以託焉居久之窺見烈女美而豔欲圖為繼室世勳乃勒朱家退狀而強委禽焉其父畏勢唯命女聞之不食其母患之倩鄰姬相勸女曰為儂語朱郎儂不活矣誓無二心焉母泣曰人盡夫也父一而已若之勢馘夫誰不懼殺人多矣未嘗服刑也兒死爾父亡無日矣哀哉奈何速禍我老特烈女聞之乃食逾時毀榜事寢擇吉來迎里中姊妹相愛者多泣送

之女則欣然登車無戚容觀者怪之阿母哭之慟或謂之曰去貧就富女喜可知也汝奚泣為鄰姬亦賤之心鄙其曩者不食之詐女既抵富兒家下車入室呼世勳曰役夫爾則禽獸其行而盜賊其心夫何使我至于此極哉吾生不能食爾肉願作厲鬼以求爾之魂魄也卒抽衣襟中預伏之利刃自刺而死年十有五歲富兒懼毀其屍投之江中

外史氏曰嗚呼高氏女可謂從容就義之賢士大夫矣吾不敢以巾幗目之也觀其強暴侵凌即以死誓一聞母氏之言慮及其親乃勉飯曲徇心良苦矣迨登輿就道談笑自若不露聲色似若養之有素者至臨難數語凜然千古賢豪也豈田舍翁十五齡女子所能道者哉

杜烈女列傳

杜小英湖南辰郡諸生杜楷公女也母姜夢一女子絳衣執玉再拜而告曰吾英臺女也敢就母儻居母諾之覺而孕及誕即以小

英字之八歲舅氏愛其慧授以閨訓諸書一目了然及讀木蘭詩并黃崇嘏傳乃掩卷歎曰斯二女不足法也夫以女子溷跡男兒中縱完身無玷亦失貞靜之道矣舅聞大異之及長許字同郡某生未歸遭辰亂舉家潛避山中無何征師糧匱大掠于野英遂被獲號泣求死軍士懼進之主帥帥一見大說納諸幕欲染之英泣告曰曩妾因母病篤矢志茹素三年今已兩載十月矣儻蒙寬假以完宿志不然惟願速死耳帥奉母甚孝聞英言潸然出涕竟諾之既而賊平挾至武昌泊舟江浒乃作絕命詞十絕句自敘章首納之油囊貯衣閒投江而死其敘略曰洋洋洞庭妾非不能死也恐投之荒煙野水中無有知者則二親終不得我存亡矣武昌省會之區楚南賢士大夫多集于黃鶴白雲閒且當貢舉之秋吾郡應試者必多其人故隱忍至此而死希長者爲妾歸報高堂耳其詞曰厭聽師中唱凱歌幾回腸斷嶺猿多將軍不下搜羅今遮莫紅妝馬上駝淚痕溼透舊羅衣夢到家鄉身未歸滿目風濤誰似

侶低低遙祝兩靈妃舟師乍轉五溪津載得佳人泊水濱寄語雙親休涕泣入江猶是女兒身憶昔深居畫閣時詩書成就渭陽師于今漂泊干戈裏猶憶挑燈讀楚辭生年十五未簪笄自古紅顏福不齊河伯有心憐薄命東流逆繞洞庭西泣斷江聲怨亂離永辭鸞鏡缺雙眉朱門空自聯秦晉死後相逢總不知身雖如葉墜江邊豈肯隨風逐浪圓萬古不消天地恨幽魂只合化嘯鵲滾滾江濤卷暮空妾心寧與水俱東山川有恨家何在誰爲招魂魚腹中鬚眉雖愧奇男子立志偏期豪傑傳完潔此身還碧落江皋一任泣鵲鵲骨肉于今嗟已矣承權惟在夢中迎貞魂卽向家園去親報高堂已不生既死逆流六十餘里至荊口驛土人撈屍得其詩徧傳南國讀者無不垂涕焉

顧季縈吳興歸安顧漢爲之女也母姚素工詩季姊妹六七八人皆嫺吟詠許字吳江張九彰九彰善病竟以病死季悲號欲絕或以未歸爲解季正色曰吾平生坐一几用一器尚欲終身不易況從

一之義敢隕越乎言已復哭哭益悲家人甚憂之時季居大母喪先夕聞翁將來唁乃檢篋中詩如千首盡投烈燄中明旦蚤起更新衣端坐若有所待翁至家眾畢出獨乳媪與俱給之他往遂闔戶投繯而死年十七

錢烈女蘭陵無錫人東林學者錢肅澗女也肅澗字礎日素以名教自任女方六七歲即授以列女傳及賀江夏女訓一過目即能成誦稍講解便了大義則慨然以節烈自負告父曰女子生或不遇寧玉折毋瓦完舍一死不足以見志兒于女訓得之矣父黯奇之許字同里黃生未歸生卒女聞訃哀痛幾絕即力請奔喪矢志守節日夕號慟舅姑憐之委曲勸諭者以百數女終不聽而哭愈哀竟以哭死年十六與夫合葬于龍山之陰

外史氏曰三貞女宛轉一死以明從一之志可謂貞于性者矣嗟乎舍生取義今之世求諸鬚眉男子所不能得乃于二三小女子竟得之何男子多昏昏而婦人多昭昭也哉噫亦可慨矣

吳烈女傳

烈女新安吳仲儒女也名復貞幼端嚴舉止不苟生母早卒從嫡母養父挾岐黃術遠游粵楚閩越常經年不歸復貞事嫡母甚謹嫡母愛之逾己出嘗私語姻婭曰吾家復貞好男子也奉我婉順須臾不見即忽忽如有失他日出嫁則亡我左右手矣願爲我擇一良婿贅于家以事我夫婦終老不然我暮年何以消遣耶于是姻婭爲之慎擇配歲餘父歸許字同邑程氏子觀鳳觀鳳年少都雅善讀書工爲文隨父游會稽還挾重貲渡錢塘遇大盜執父欲殺觀鳳匍伏叩首號泣請代盜怒投觀鳳江中舍父掠其金而去計聞吳母患女有他變祕弗告久之鄰母洩之女遂絕食誓死母與姻婭涕泣勸諭者以百數不聽鄰母以其事由已洩也叩頭流血以請亦不聽舉家皆戒嚴踰五日女忽笑語飲食如故母度其幼稚固無定識遂懈防閑越數日母往鄰母家女遂閉戶經死年甫十四髮猶未束也

外史氏曰予讀五代史至馮道事四姓十君不禁啞然齒冷嗟乎使與復貞相對能不愧死乎

方烈女傳

方烈女長洲縣山塘人也幼貞淑未嘗妄出一笑語母早卒事繼母甚孝吳之俗雖貧家女多濃脂豔粉愛事佳麗女則荆布釵裙雅素妝束而已然年十三四即容光動人窈窕幽閒居然好女子也里中人豔其貌求偶者甚夥上皆不吉惟郡南窶人于某益之而協遂約婚未幾有富翁某垂涎女美欲圖為側室乃厚賄媒氏以重利啖其繼母繼母說于利乘父遠出竟諾之女知涕泣不食者累日然猶冀父之即還也或可以毀而富翁亦慮其父之即還也或有他變竟擇吉迎有日矣女呼天嗚不止誓死繼母患之守甚嚴女忽不嗚舉措如平時伺繼母稍懈即疾趨出投山塘河水死年十五時康熙丙子夏五月望後一日也郡人哀之為詩文弔者以萬計

外史氏曰今夏予旅食邗江客有從吳門來者甚言烈女烈狀繼母迫之甚女惟涕泣矢死繼母又倩長舌嫗數輩說之百端皆弗聽卒以死死三日當盛夏顏色如生略無惡臭嗟乎若烈女者雖千百年後白骨猶香豈直三日也哉

王烈女傳

王烈女河南祥符縣人幼貞淑能以禮自持許字同里于氏子年十七于氏子歿女聞之號慟欲走赴父母難之強而後可既至撫棺痛哭舅姑力勸乃已遂留侍二老期年大祥即閉戶自經死死之夕有白氣繞室照耀如晝俄有星隕事聞旌其間中廬李相國容齋作十絕句以弔其詞曰三生緣重一生輕最訝無情反過情拜罷姑嫜成婦禮此身誰道未分明鄰井東西各玉津羅幃久別繡幃親可憐日日生芻供猶是梁家舉案人不是于歸豈大歸磨笄心遂結襦違孤棲黃鶴猶無意青學流鶯乳燕飛憔悴春華玉筍痕闌風仗雨幾黃昏翻身笑逐重泉客縱有名香不返魂一致

彭殤總幻緣紅顏含笑白頭憐深閨已作千秋事不枉藏嬌十七
年星隕光沈紀夜分人傳繞室白氤氳知爲一縷幽貞氣結作金
梁五色雲充素瓊華夢裏妝春風未試已秋霜女貞近傍男青菱
落日荒煙哭白楊兩小蹉跎六禮遲畫眉未倩况齊眉九原若有
投金事總遇秋胡知是誰在環金梳總無憑寂寞幽宮冷漆鐙蝴
蝶翻飛鳥鵲杳空臺何處泣青陵四姓歌鐘屬舊家于門高大感
厥車溫綸一紙貞魂慰何必縹緲判五花讀者哀之
外史氏曰或言一女子烏足以關乾象死而星隕其謬也耶噫是
何言哉在天星辰在地河岳皆忠孝節烈之氣所鍾也天地所重
者名節女子能烈則與天地合其德矣烏得謂之謬哉

曹貞女傳

貞女姓曹氏江陰虞門人許字同邑李善祥年十四善祥卒聞計
哭甚哀卽欲奔喪父母弗許乃剪髮斷指誓不二天又弗許夜半
卽自經于室保母救乃甦于是聽其往至則撫棺大慟不食累日

欲與俱去姑諭之曰吾兒命也爾來爾心盡矣爾死是重吾以悲
矣女曰姑如許盡夫喪執婦道以終事二人則苟延以活不然願
速與夫子同穴耳姑慮變佯諾貞女乃食旣殯母使來迎揮使者
去曰爲我謝二老幸自愛母以女爲念也吾父讀書秀才豈不明
一與之盟終身不改之義乎俟服闋吾方歸寧耳今斬焉衰絰之
中二老亦奚忍以見我哉使者往復數四終不返其母自迎者再
舅姑力勸之返終不聽遂安于李氏貞女泣血三年未嘗見齒奉
事舅姑極其孝敬晨昏定省婉容愉色怡然有孝子之狀凡百委
順惟恐舅姑或不懌也父母憐之厚遺其奩贈曰未亡人安事此
爲變易之經營生計貞女操家有則而律已恭儉人皆敬畏十年
竟成富室後舅姑相繼卽世病革時呼家人集告曰是女吾門之
節婦而兼孝子者也事吾夫婦四十二年如一日吾夫婦死願若
等善事之貞女盡喪畢以家財悉授其姪曰汝主之以供吾老乃
獨處一樓足跡不履地者又四十二年九十八而卒與夫合葬

于砂山之陽
 外史氏曰先慈貞女之從孫女也先慈為予言貞女事甚詳幼嘗
 詣貞女教貞女樓居獨坐如神明凜凜可畏二婢侍竟日不聞效
 唾聲諸女孫進謁不命坐不敢坐常侍立終日貞女侃侃談節烈
 事為訓命之返方敢退貞女性嚴即三尺童子不許登樓諸子孫
 請安及親戚問候者皆于樓下中庭貞女則倚闌慰謝貞女年九
 十髮如硃砂顏如渥丹無有衰狀道書曰全其天貞者老則髮白
 轉赤而形神固信然哉予弱冠時往省外家嘗展拜其墓在荒煙
 蔓草之中恐久湮泯因請于玉仁舅氏立碣識之題曰明故李善
 祥未婚妻曹氏合葬之墓嗚呼庶其少延久遠哉令神靈其歎
 宋貞女列傳二宋李自愛母心文
 宋貞女歙州富資溪上女也年十四許字同邑汪士奎士奎弱冠
 從父客嘉興
 大兵破城而士奎死之女聞訃號痛不食欲死母流涕勸之勿死

女曰欲兒不死當如兒志母曰第毋捐生罔不聽也女乃食遂私
 製喪服候婿歸即往弔之入門斬焉縋經號哭家人大駭擗踊
 畢問婿寢安在婢嫗引以入則踞而不去曰吾願朝于斯夕于斯
 哭于斯執婦道于斯終吾身于斯矣汪氏舉家益大駭曰此豈易
 言哉力勸之返不聽乃安于汪氏四十餘年而卒其後又有潘氏
 者許字邵村張氏子張早卒女年十六矢志終身不字順治戊戌
 訛言采宮女于江南民家女年十三以上者無不嫁潘氏祖謂女
 曰人情皇皇徧國中無不婚嫁者矣勢難留汝益結褵乎女曰兒
 終不願他適也無已其歸張乎祖走告張張難之方躊躇間而女
 車已抵門矣初女車行在道患舅姑不納又患祖給己所歸非張
 也經村落必停車位問是張里問是張廬舍然後入登堂拜其舅
 姑執婦道者垂四十年今已五十有四矣
 外史氏曰余嘗流覽女史古節烈女子往往遭禍亂流離顛沛百
 折而志不少挫卒以完身嗟乎節烈誠良苦矣二貞女垂髻守志

以至白首可與女史諸賢並驅千古也

夏貞女傳

夏貞女端姪貴池夏煌女也許字同邑姜綦齡未嫁而綦齡卒貞女甫十七聞計毀容痛哭矢志不字願侍舅姑以終婦道父母不許依母氏八載屢強之嫁不可終歸于姜歸之日縞衣出拜而髮已皤然蓋哀痛過而血頓衰也事舅姑至孝躬井日親織紉惟勤且謹立綦齡主于室事之如存又爲立後以續禋祀未幾舅疾篤貞女親嘗湯藥所天代死居喪蔬水哀瘠服除始姑輩越三載以母病歸省母歿哀毀絕粒者數日而貞女遂病篤昆季延醫治之曰予未亡人恨不早從夫子地下何以藥爲速一死吾事畢矣吾寧肯令醫者按吾臂以捉吾脈耶所慊者姑春秋高不獲終事爲不瞑焉耳遂卒年三十與綦齡合殯于船峰之側郡守喻成龍高其義表其墓曰天植芳貞

外史氏曰余聞貞女誓志守節八年之間父母強之嫁者以百數

而矢心匪石不可轉也終歸夫家以奉舅姑迨母卒過哀成疾堅卻湯藥而以早從夫子地下爲快嗚呼視彼覲顏二姓者何啻天壤之隔哉

安豐民王氏女傳

女泰州安豐亭民王北望女也北望貧恃女紡績常苦不給媒因言某室溫飽卽女歸不至爲何翁憂北望諾之遂約昏久之乃知所約者爲諸王故家奴子女恚曰人各有耦人奴非吾耦也奈何過聽媒氏言而以求溫飽故重辱我遂以必死自誓其母守之嚴不得死康熙壬申冬民間訛言

朝使且至將采宮人于東南吳越聞民家女無論妍媸父母不暇擇配多遣嫁已聘者迎歸于是所約者亦以昏期來女知之私問其弟曰門外水能溺人乎弟幼無所知乃實告曰水淺惟某處河溺則不復生也抵夕女故作懽容北望妻以女且喜不深疑女乘間縫衣裳甚固投弟所指水深處死

外史氏曰余讀史至平陽公主事扼腕者久之當武帝之世漢家豈少一賢列侯哉乃區區傾倒于前日之騎奴耶無過曰將軍尊貴為爾王女不在溫飽皎然不降其志不辱其身噫與平陽公主異矣

李貞女傳

貞女宜興陳維翰妻也父李枚邑諸生以周易授生徒于家女四歲聞讀書聲過耳輒不忘父奇之訓以書七歲通周易學書有衛夫人之妙祖母劉年高目盲不能視女砥之逾月復明母黃患篤疾女禱天作表奏上帝請以身代疾遂愈年十三許字維翰女寢室中庭忽產白芝一莖七日長七尺大如箕有光如月照耀一室夜可不燭而讀也人皆以為瑞年十五陳氏已約昏期而維翰墮水死計聞女即不食求死母力勸之女曰如欲兒生願如兒志母曰兒欲何為女曰願歸夫家以終制母諾之女乃衰絰往舅姑大驚既入撫棺大慟妯娌勸之再乃已請畱以事舅姑舅姑不可女

曰若是者願從夫子地下矣乃畱之既葬操井曰勤女紅夙興夜寐以事舅姑三年之喪畢撫伯氏子為嗣愛若己出後生孫男七曾孫男二十一玄孫男六十四卒年九十有九順治丁亥歲也

外史氏曰貞女守志垂百年卒致子孫及百豈非天報其苦節哉

胡貞女傳

胡貞女荆門州人幼淑慧有至性及長通列女傳及賀江夏女訓諸書每讀史至忠義節烈故事即低徊太息乃至掩卷垂涕家人皆知其他日必能以奇節著也許字荆州少司馬張著漢可前之少子未幾以力學故得疾早卒計聞女不食求死家人以未結縞為解女曰一與之盟終身不改豈指結縞者言乎吾不能以生死二其心也不聽姻婭集于室從容曲解者以百數又不聽母涕泣以勸女曰欲兒不死當如兒志母曰第母死如兒志可也女曰願奔夫喪守志以終身母諾之文明日即行抵夫家撫棺號痛至失聲婢媪力勸然後休乃拜見舅姑直登夫牀曰吾將生于斯死于

斯矣揮從者反止留一婢供執役舅姑大驚辭不可女泣曰若是者請與夫子同穴于是舅姑懼乃許之竟安于張氏執婦道焉母使使迎之女曰今斬焉縗絰之中未可遽歸寧也三年方拜母賜矣母乃止

外史氏曰女子生而願為之有家未結褵而良人死豈其願哉然能踐一豈不改之義而矢志終天何其烈歟

莊貞女傳

貞女武進縣順治己丑進士莊慎菴有筠之女也幼有至性事父母能盡道通女訓言笑不苟許字同邑乙未進士黃長第雲史之子諸生某某以攻苦得疾早卒女年十七聞訃號慟欲死父母固勸之乃解久之其母欲使之嫁女曰兒嘗奉教古列女矣請死以守從一之義乃翦髮誓志不二母乃已居數年終日默不語母憐之曰爾既守貞不字益歸空王雉染為尼乎女泣曰嗟乎兒守從一之義者為三綱五常也奈何為異端辱名教哉且尼道汙

矣世未有好女子而為尼者兒安敢適從乎遂抑鬱成病臥牀第者二年垂死謂其母曰已矣兒死矣兒之矢志者為黃氏子也今兒死而黃氏子無後目不瞑矣為兒傳語黃氏速為我立後乘兒一息尚存得睹嗣子而甘心焉母乃使使告黃氏為擇應繼者子來拜牀下女強起撫其首者再長吁而逝年二十六與夫合葬焉外史氏曰女子不幸未結褵而夫喪嫁者多矣父母國人亦未嘗賤惡之也乃莊氏女夫亡矢志至抑鬱垂死猶殷殷為夫立後可不謂貞且賢乎

徐貞女傳

徐貞女名純懿定遠人也幼貞靜沈默有古淑女風既長端嚴不苟動止以禮自持事父母以孝年十四許字同邑馮氏子廷棟故姪姻也廷棟垂髫好讀書以力學故得疾不起垂死舅姑召女與相見父母不許女曰既已許馮即為馮氏婦死且不改況生乎固請往乃許之既見廷棟目瞑女哭之慟即矢志守貞舅姑不可女

即以死自誓舅姑懼乃可之其奉舅姑以孝聞舅姑歿無所依乃大歸于徐既而父母又歿遺三幼弟女即撫之操其家政內外井然且嚴以持己家人皆望而畏之三弟稍長即督之學既長悉為婚長亮弼次亮彩季亮工俱補博士弟子員後數年俱以明經貢于

廷貞女卒年九十有六康熙戊午歲也

外史氏曰吾聞貞女智有盜圍其室計劫貞女盡操其財貞女開門揖之盡踏筐中菽于地盜趨前悉潛什貞女得脫大呼家人逐之盜乃遁噫天下愚婦人多矣倉卒變起卒不能自保而至失身若貞女守貞撫三幼弟而至成立出其心有定見不為外物惑也觀其卻盜可知矣

阮貞女傳

阮貞女天長人幼讀書有至性事父母能盡道年十二許字同邑王道昇道昇父璠字魯玉以明經為粵東茂名令道昇往探父染

瘴癘得疾歸未結禱而卒計聞女長號不食欲死其母固勸之乃解即縗經詣夫家撫棺大慟自經棺側妯娌趨救得免家人戒嚴者月餘其母自來迎之女固執不歸曰兒今日歸即今日死母乃止竟安于夫家伯亡即撫其孤為嗣愛若己出親教之讀書通經義方令就外傳為之娶婦生孫為女不腥食善持家勤女紅十年家道成又十年稱邑中素封性好施與凡族中貧乏者悉周濟之待妯娌如同懷持己甚嚴平生無疾言遽色未嘗聞其有笑聲姻婭謂之曰娘子守貞不字同未亡人良苦矣然不妨時尋歡笑以遣歲月何窮年戚戚耶女曰某之贅天與之苦也安敢違天而強尋歡笑哉卒不笑自十四夫亡至七十四而歿未嘗一見齒有終身之慕焉

外史氏曰女子守貞已難更為撫孤成立創業以貽尤難之難矣非女中賢豪哉

王烈女列傳

烈女名美姐山東濟南郡海豐諸生王亮章女也性溫淑年十四許字同邑李格越四年格以攻苦得疾卒女聞計卽閉戶投繯家人覺之奪門解救得甦大父母及父母慰之再三終不得解乃令婢姬嚴護之女不得閒不能死越四十日忽笑語如平時家人以爲解矣遂懈女乘閒整衣妝夜半倚窗縊死年十七吳烈女者村農吳自立女也名七姐登州招遠人幼許字同里孫管佳康熙甲辰春管佳以疾卒女聞訃痛哭不輟卽欲衰經往弔兄沮之不得行遂棄鉛華屏腥食矢志守貞久之其兄密以許劉姓女知之卽秉義不更誓欲殉夫兄令家人嚴守之不得閒倩姻姪勸之女僞曰吾從若勸不死矣乃言笑如平日兄信之秋九月九日兄與嫂俱詣姻家飲乘閒走詣母墓縊樹而死年十四外史氏曰二女子之于夫也昏禮未成止通雁幣耳所天玉折卽決志不二宛轉一死相從地下洵貞軼詠舟烈同伏劍者矣

池烈女傳

池烈女江都人幼失母父老貧且病日爲紙鏹鬻于市兄爲人傭取值以資女佐以女紅家稍給女端莊貞靜以禮自持父兄出日扃戶紡績卽鄰姬亦罕見其面者旣長許字同里吳氏長子廷望廷望尚武好馳馬試劍從某帥征粵去數年不相聞女戚然迨帥還廷望詎不歸又一年父兄詢之竟失所在蓋歿于陣也女泣曰噫吳大郎死矣生未面耶願相從地下父兄偵其意更相護之不令獨處舅素無行意欲以女匹其仲子父兄向懾其威不敢強又不忍對女言乃倩外媪婉告女女忿嗚咽不能出一語終不得自明也越數日反屢笑容以對父兄父兄以爲可矣竟懈防皆他出女伺父兄行遠始扃戶復墜扃內戶盡取吳氏簪珥作新婦妝向父兄榻前再拜復拜其母神主結縵于牀梁引領就縊亟下曰吳郎在南安忍背之乃南向就縵縵絕續之再絕復續如是者三乃死年二十有一父兄還叩戶不應排闥入急救之不復甦矣太學生汪文標烈女率眾往弔聞于有司以貞烈旌之

外史氏曰烈女死在康熙己未之上已越數日臭從棺出過其門者皆掩鼻汪生往弔怪之祝曰汝白骨千百年後猶香者也何為今日即爾耶祝已即不臭噫孰謂死而無知哉

汪氏雙貞女傳

汪貞女新安儒士曹士順妻也士順父與貞女父幼同學長同游郡庠又相愛也如同懷既而曹生子汪生女又同年月日時兩家姻婭大喜相謂曰此天生佳兒佳婦也遂賀兩家湯餅執柯約為婚士順既冠陳羔雁定婚期而疾作女入門則士順絕去不復甦女痛哭矢志靡他孝事舅姑執婦道者若而年舅姑歿獨居一樓不下階者又若而年七十有八歲而卒與夫合葬于天都之陰其族有娣從父僑居繁昌許字同邑吳氏子為婦將笄而夫歿女先夕夢湘神遺之釵釵著貞節二字明且凶問至女悲曰神啟我矣貞固吾志願依吾母晨昏以終老母歿女又悲曰親死安歸母老固未敢以身歸吳也今老母幸以天年終予當歸骨于吳氏矣既

葬遂歸吳氏獨處一室以女紅自給不出戶者五十三年而卒壽八十一與吳氏子同穴焉

外史氏曰余讀黃岡杜于皇詠雙貞女詩曰處女終身祇一天幾迴腸斷夜呢鵲汪家姊妹沐霜節今古鬚眉不值錢不禁感慨繫之矣

仁和顧貞女傳

貞女浙江仁和縣民顧氏子也小字賽姑幼貞淑不苟言笑既長許字同里費氏子琦未結褵而琦歿女聞計時向隅涕泣矢志守貞然不敢言也既而父母復許魏氏兒女即呼天號痛誓為費氏未亡人父母不欲也康熙丙戌春女同姻婭掃先鬼塋道壻門或示之曰此汝壻家也女曰然乎曰然女熟視之曰果然遂趨入安焉舅姑勸之反勿聽父母促之再勿聽鄰里鄉黨諸女親力勸之女曰吾固為費氏人當為費氏鬼終勿聽于是里中父老率子弟數百人白其事于攝尹郡別駕勿信令核之他日百姓羣擁署庭

稱賽姑堅持勁節狀攝尹遂允貞女乃得依于費氏其事舅姑也
孝而勤家人皆大說無何有姦徒張姓者喉魏氏兒挾其母訟于
縣以穢言讒貞女諸父老復擁數百人爲之稱屈于庭攝尹大怒
痛撻姦徒勒其父償費氏聘乃息吁貞女可以終費氏之守乎
外史氏曰曩余道經一郡郡刺史酒人也每升廳事必先酣飲醇
醪登座則茫然不知天之高地之厚矣非呵罵屬吏卽鞭笞胥役
姦民有利媮婦財迫之嫁而訟于刺史刺史乘醉痛撻媮婦以其
產重賞姦民婦因以死上司卒不聞嗟乎主持風教者無人縱有
節烈誰爲之厲顧氏女可謂幸矣前數年錢塘孫氏女秀姑許字
楊氏子奸人嚴姓欲犯之不從服滿而死撫軍以聞遂辟嚴姓而
旌其墓貞女終節可以爲孫氏繼矣

江寧朱貞女傳

貞女江寧郡博士弟子員陳益桂未婚妻縣學生員朱萊女也萊
兄英爲江寧名孝廉令山左肥城有異績英子士履康熙丙子科


江南解頭萊兄弟數人皆以文名五男游于庠者過半江寧以詩
禮世其家者稱朱氏爲盛世居城西芝麻營一里之中絃歌之聲
惟出朱氏貞女幼聞父兄詩禮之教通女孝經諸書大義遂識大
節母蚤卒晨夕哭泣經數年不輟事繼母能盡道及笄許字益桂
將婚益桂以攻苦得疾勿克娶貞女聞壻疾每夜禱天以求愈逾
三年益桂歿貞女聞之誓以身殉將夙所治匱或焚之或毀之或
授之婢妾或貽之姊妹密吞金珥以求死諸嫂力救得免遂絕食
父母泣勸之對曰大人欲兒不死願歸于陳請以匱易田而爲終
老計則或可矣父母諾之乃不死日請易田以歸陳未能也終三
年喪命易服堅辭之聞有異辭卽不食以求死至今猶麻衣素笄
于閨中

外史氏曰朱氏故江南詩禮家也其子弟多閉戶讀孔子書是不
輕入官舍務敦厚崇禮讓或有一二輕薄者舉宗皆恥之以故子
弟多端方孝友今觀貞女從一之志如金石益堅知其家詩禮之

化深也

雷溪外傳十五

雷溪外傳卷十五



雷溪外傳卷十六

閩德部

辛嫗傳

辛嫗者江都死難諸生韓文適家僕婦也姓董氏世居斑竹里崇禎末歲凶力食于韓性忠愨不憚勞瘁事無巨細必求其當文適夫婦甚重之嘗曰他日有緩急是嫗可倚藉也歲乙酉揚州破文適父子死之妻蕭氏以三歲魏孤託嫗而後偕長女縊死時城中火四起殺人壅街市嫗抱兒雜死人中晝以竹尺許柱死屍伏兒于屍下祝曰天不絕韓氏兒勿唬兒果屏息不出聲初蕭氏好潔嘗漚麥粉為衣漿者盈疊謂嫗曰遇有急此粉亦可療飢至是嫗以粉匿衣襟中詐死人偃臥羣屍旁乘閒嚼粉飼兒凡三日兒得不死亂少定潛行至江滸傭工以活兒歲餘文適之友高紫峰者知孤在求歸撫之至十餘歲未嘗離嫗懷抱每對孤述其父母生平輒嗚咽涕泣不休及孤長餬口四方嫗亦歸其子追思文適夫

婦并念孤未成家日夜號泣鄰人苦之嫗語其子曰吾無所事願
牧牛卽牽牛之野伏田塍下仰天大哭嗚嗚不絕行道入與畊者
聞之無不垂涕曰此辛家老嫗哭其故主也自是野哭以爲常孤
歸復走京師期六月返嫗居城西女家每食畢卽立市中望孤遇
策蹇者輒迎謂曰汝歸來乎吾望汝久矣市中人不知所爲皆愕
然及孤聘妻嫗大喜曰今年得覩新婦矣旣而病且篤歎曰吾其
已乎乃肩輿詣新婦門熟視婦泣曰婆子病且死不及見爾夫婦
之好矣厯告其患難母且曰善事夫子毋效世俗慢易良人也婦
敬謝之歸未幾卒年八十三遺命葬于韓氏祖隴之側
外史氏曰可以託六尺之孤曾子則以君子歸之辛嫗以龍鍾老
婦負三歲孤走戈戟中當萬死一生之際而委曲保全以成之嗚
呼亦女中之君子矣

趙家嫗傳

趙家嫗失其姓氏江陰諸生趙某家老嫗也爲趙氏世僕其先十

餘代皆能忠事趙氏趙氏見嫗之淳朴亦不以奴婢視之皆呼曰
老姥歲乙酉

大兵圍邑城城垂破嫗泣謂主人王母曰城破無少長皆斬矣相
公與娘子當早自爲計毋被刃也三歲小郎君婢能保之以延趙
氏脈雖肝腦塗地決不負君家累世恩也于是趙夫婦同三男二
女闔戶自焚嫗卽負其幼男出抵城隍廟伏空棺中凡七日夜亂
定乃出初嫗預藏炒麪數升衣閒坐棺中飼兒故得活旣出遂走
東鄉乞食于周莊華墅兩鄉堡凡六年兒大乃還城中詢趙氏親
族得趙氏弟于石橋走告孤在弟乃收字之年十五猶與嫗同臥
起後娶婦生男七人孫男十九人曾孫男數十人皆以祖事嫗至
康熙十五年九十六而卒葬于趙氏祖塋之側春秋祭掃謂之
義母冢

外史氏曰鼎革之際吾邑獨以抗
命故受戮趙氏全家焚死存此呱呱三歲孤藉嫗艱辛撫字得成

立今子孫垂百皆其一人賜也嗚呼豈不難哉

葉夫人傳

葉夫人無錫葉提學之妻也失其氏并失傳提學之名及何科進士居石幢鄉父老言其故明時兩任提學副使致仕歸載竹箱數簾夫人方與婢磨麪聞提學歸亟命婢灑掃家廟及見箱簾卽艱然呼婢勿往仍磨麪如故提學訝之曰別經數載今始歸來何漠然不顧耶夫人曰非也吾聞若歸卽命婢潔除祠宇俟謁祖畢然後相見今見若纍纍數箱非宦囊而何朝廷兩以提學命若不清白自矢而歸有贏餘必扼抑孤寒登進紈袴士之受若擯斥者多矣負朝廷而辱名節不可以對祖宗非吾耦也故輟掃終磨不欲與若相見耳提學笑曰卿誤矣卿意簾中乃黃白物耶吾拔雋才惟恐不及愛其文并收其卷攜歸以志不忘耳卿何疑之過歟且吾歸途費猶不給烏得贏餘哉卽開簾令視之果皆兩省所得佳士卷也夫人大說停磨振衣謁廟治酒歡然偕老終焉

外史氏曰嗚呼葉氏之婦不淫矣能相夫子以義矣吾聞明之季世以學使爲美差取士不必以文也以金多寡爲去取耳秩滿報命賂津要陟顯位榮妻妾驕貴以爲吾夫壻洵位尊而多金者矣其視葉夫人不過一愚婦人徒自苦耳何足道哉噫亦可哀也已

岑太君傳

岑太君者明楚藩郡主也幼好兵法有勇婢妾皆佩刀侍年十五善射穿楊百中又善雙劍能飛斬人頭三十步外然有柔德對左右未嘗有疾言遽色十七工書法有魏夫人之逸楚藩絕愛之畱心擇配徧顧羣下無一當者時楚有岑君方冠以騎射補營幕忠顯校奉帥命入府啟事楚藩見其器宇不凡遂以郡主字之及流賊犯境勢甚猖獗太君授岑君野戰法率壯士五百大破之擒賊首鐵棗兒黃標葫蘆等論功越升副將旣而張獻忠大舉入寇又大敗之晉銜總戎坐守荆南一帶江左右得不遭賊蹂躪者預有

力也甲申賊復率眾大破荆湘諸郡進圍岑君君乃嚴督士民守禦太君常授奇計屢出奇兵殺賊或親帥婢妾數百人佐戰臨陣多所斬獲賊眾畏之堅守八閱月糧絕援兵不至城破值岑君大病垂斃太君急呼家眾整頓以帛束岑君親負之率署中男女五百餘人上馬舞雙劍前導賊見披靡遂突圍出賊或馳逐即命家眾發預製連機弩弩一發四十九矢賊皆應弦而倒遂不敢追捷走三百里乃息駭男婦無一失者蓋素日訓練之精也國亡同岑君隱居江東後連舉三子長曰嚙者弱冠即能文順治閒請赴科舉太君不許曰前朝之失皆由腐儒咬文嚼字猾吏侮筆奸法所致爾輩又何可復躡其轍耶不如習弓矢學刀劍爲

國家建實在功業遂授諸子韜略武藝數年俱成將材岑君卒買山雲閒葬之攜諸子家焉卒年七十餘

外史氏曰岑太君可謂女中良將矣何其訓士之精耶有明垂三百年專尚八股文字武備不修故賊一呼而堅城輒下若得將帥

如太君者數輩精練甲兵亦可滅賊悲哉竟無一人也

蕭震妻傳

蕭震妻失其氏福建侯官縣人也震以進士官至太常在臺中時曾疏論耿精忠不法後因母老乞休居鄉值精忠叛徧授諸搢紳僞秩從者甚眾惟李光地彭鵬不屈將次及震其妻告曰相公爲朝廷名進士位班列卿官非不尊

恩非不深也今賊負

國爲亂旋見滅亡且與相公有隙必先逼授僞爵以收民望後必繩以他事而報宿怨與其死賊無益死

國須乘其僞命未下先自爲決妾願同死乃陳雙練泣請俱升震曰吾死甚易奈老母何曰相公死義爲太夫人榮如生從賊貽臭千古爲太夫人辱與其生爲太夫人辱孰若死爲太夫人榮爲榮爲辱在相公耳何難易之論哉且相公年紀老大早晚要死何必貪活此數日甘授首于逆賊耶不聽卒受僞職妻乃大忿曰吾不

忍爲賊子婦遂入室自經後精忠果以誤糧斬震沒其家
外史氏曰烈哉蕭氏婦也其死也非爲要聲譽于鄉黨也不忍爲
賊子婦也使當日士大夫皆知夫人立志不忍爲賊子臣各率其
宗族子弟以死拒賊彼耿氏逆亦何能跳梁哉

咎孺人傳

孺人姓阮氏懷寧縣博士弟子員咎弘祖妻也咎之先世居陝西
三原自高祖貴三游學江南愛皖北大龍山下杏花十里碧澗清
流有盤谷之勝遂築室焉貴三生陽陽生學易萬曆朝癸酉孝廉
也令江西金谿有異政士人至今思之學易生文中爲博士弟子
員以博洽聞文中生弘祖弘祖數歲卽舉止如成人文中愛之甚
謹爲擇配乃得同里某都推官阮士儼女卽孺人也幼貞靜沈默
寡言笑有古淑女風甫結褵遭左良玉亂以誅權奸馬士英爲辭
自楚勒兵下金陵前軍抵皖縱士卒焚掠孺人見賊至卽投家園
淺池中賊鈎之起欲劫以行孺人厲聲罵賊奪賊刃欲自殺賊怒

揮刃連斫體無完膚孺人死去賊意孺人不復生遂棄之半日孺
人甦先是暈死中若有人言廊西有火可燒敗絮灰填創處且牀
頂板上可免旣甦果見西廊敗絮委地負傷就火焚填之至夜半
血流少止匍匐至牀前欲登頂板不得以創重故復暈死覺有二
童子挾之而登旦賊復來盡搜所劫餘竟不及牀頂孺人得免賊
退城中數日無人跡孺人渴思飲晝猶不敢下每至夜分求水則
唯二童子上下焉後家人至從牀頂得孺人昇之山中得不死其
事夫子以恭順稱奉舅姑能盡道亂離後家貧孺人勤織紉操井
臼篝燈佐讀以是弘祖年少博學爲名諸生孺人卒年七十餘
外史氏曰吾聞孺人有婦德能以義方訓其子長茹芝仲茹穎皆
有文行孝事孺人孺人性嗜鮮鮑山中不產二子遠求以奉之及
孺人卒二子終身不食有曾子不忍食羊棗之風焉嗟乎亂離之
時大江南北紅顏女子含笑馬上行者不知其幾乃孺人甘刀劍
如飴竟以死拒賊卒免于辱宜乎有孝子之報也

遠山夫人傳

遠山夫人朱中楣江西南昌人前朝宗室女也幼淑慧數歲即通女孝經女訓女誠女史諸書垂髫工吟詠有謝道韞風性孝父先卒痛哭不食者累日夕事母克盡子職及笄歸吉水李元鼎以恭順稱元鼎前進士官郎曹甲申闖賊李自成肆逆犯關三月十九日莊烈皇帝殉社稷京師陷既而我朝定鼎起用前朝諸臣元鼎應

詔出中楣沮之不得乃贈之以詩曰妾身自是裙釵女羞把蛾眉別畫人不欲偕行願獨處山中緝繡課子及元鼎拜少司馬誥封中楣夫人然中楣甘荆布不事穠華惟朝夕吟詠自娛而已有詩集若干卷行世年六十餘卒其弟可中狂士也作詩哭之曰有淚未傾聶政弟夫人猶愧昔時封可稱難兄難弟矣外史氏曰吾讀夫人贈司馬出山詩與今日捉將官裏去這番斷送老頭皮之句並傳云

邵飛飛傳

邵飛飛者字扶搖三山西湖女子也幼孤其季父授村童句讀飛飛隔牆聞讀書聲過耳輒成誦七歲徧記學庸論孟毛詩常闇誦于室季父奇之教之識字一目了然稍講即通大義垂髫以才貌聞里中求之者阿母皆不許益欲售顯者以圖富貴也聞寇伏誅姚菴總督關南幕員有羅密者道經其居見飛飛澣衣湖畔豔羨不已復廉知能文遂彈力圖之乃託辭繼室以千金餽母又厚賄其季父即歸之居五載秩滿還京師其婦悍妒且虐不能容遂以飛飛配閹人乃作薄命詞二十絕句燕臺詞十絕句以寄其母而死其薄命詞曰誰憐青鬢亂飄蓬馬上琵琶曲又終嫁得倉夫雙足健報人佳婿喜乘龍隔斷江山幾萬重粉脂零落爲誰容如何嫡嫡親生母只愛金錢不愛儂停鍼無語對銀缸心自酸辛淚自雙高壘愁城堅似鐵酒兵十萬總難降荻簾日影上遲遲亂綰烏雲不畫眉羨殺隔街誰氏女金錢閒擲買胭脂鵝鵝比翼兩相

依文彩編繆世所稀誰料風濤生洛浦鍛翎又逐野雞飛白雲縹
緲望中迷獨倚蓬窗掩面嗚萬里北堂知也否碧梧不是鳳凰樓
想後思前恨屢加誤人都是浣溪紗既然負卻當年意何必尋春
訪若耶十里西湖憶舊游而今無復汎輕舟自憐磊落看花眼日
對煙窗雨淚流積雨污泥盡沒階行行溼透小弓鞋偶思多少俟
門女指點青鬢對對排不須重賦白頭吟入骨憂煎死易尋贏得
芳魂歸去好一杯黃土百年心自憐薄命更誰如蘭不當門竟被
鋤回首五年成底事珠圍翠繞夢華胥土砌茅簷撲面塵可憐觸
目也傷神看他赫赫司晨牝也是奴儂一樣人獅子容他吼獨尊
卻將儂去配司閻兒郎薄倖真堪恨不記天香枕畔溫憶昔雙雙
倚畫闌名花相對並頭看何期棄置同秋葉忍使琵琶別調彈淡
淡春衫嫋嫋腰菱花自對亦魂消如何剛恨河東性相見雖憐竟
不饒五載紅妝窄袖輕人人都道妾傾城郎情底事秋雲薄莫訝
青樓日送迎挑燈含淚疊雲箋萬里緘封報可憐爲報生身親血

母賣兒還賸幾多錢無端昔日慕金夫也是貪痴女子愚寄語故
園諸姊妹釵荆裙布自堪娛自悔當初博望高今成明月水中撈
風箏本是隨風性莫怪絲絲縷不牢無奈鴟鳩居鵲巢啄將紅藥
出林梢堪憐薄命愁如織卻與詩人作解嘲其燕臺詞曰袴褪郎
當短短衫高縉頭髻更囀巖教奴依樣常妝束滿漢平分道不凡
摩挲雙眼雙蛾掩面呼天怎奈何俗子不知人意懶挨肩的的
唱秧歌柳色青青詠漢南樹猶如此我何堪輸他鄰婦無思慮梳
大葵花滿髻簪怪聲狙獾吟多般反道奴奴缺舌蠻悵望夕陽芳
樹外嬌鶯嘹唳語家山炎天斗室穢難聞燒酒生蔥盡日熏記得
故園風景好白羅衫襯石榴裙豕圈雞棲暑氣熏喻喻滿屋鬪青
蠅有人水閣珠簾裏猶說今朝熱不勝蜀魄嗁殘不忍聽斷腸最
是雨淋鈴劈蘭老米鍋焦飯南國佳人幾慣經秋宵偏厭酒人狂
雨怨雲愁總斷腸一枕正成鄉曲夢門前又喚賣甜漿驟車陣陣
響如雷門外風吹百尺灰可惜青蔥織似玉日生鑪火簇煙煤北

地風高朔雪寒滿天飛絮壓重簷炕頭不是尋常火馬糞如香細
細添共三十絕句所親得其詩於母氏徧以示人讀者莫不憐之
外史氏曰紅顏薄命自古而然況有才乎才者造物之所忌也丈
夫擅之且猶不可況女子哉況女子而又使之不得其所哉宜其
怨之深而言之忿必至于死而後已也余讀飛飛詩三十章感慨
係之矣

卓夫人傳

夫人荊州水師副總兵官遼陽卓聖之貳室也姓徐氏河南人生
有膂力身長八尺能挽二石弓百發百中善雙劍馬上舞之如閃
電交馳令人目炫崇禎末中原流賊塗炭城邑破殘殆盡徐氏陷
賊中貌寢陋賊不喜每遇戰驅之先衝然每戰必捷賊大喜稱爲
女將軍令副賊帥略地洛南時聖以游擊率師往征大敗賊飛天
王老回回于洛下俘徐氏愛其驍勇畱侍帳下逢大戰卽奮勇當
先所向無敵賊畏之曰卓將軍易與耳彼女先鋒利害不可當也

往往避去聖嘉其功納爲貳室旣而聖遷督荊州營水軍茅隆山
王二王三者擁眾屢出犯督師者數敗績制府乃調聖等一十三
路軍共攻之山中發弩飛礮奮力死戰諸路軍俱敗績聖被重創
諸將皆失印信損士馬法當斬徐聞之大驚亟詣軍門請以五百
騎擒賊將軍門方憂賊遽召見與語大奇之如數授以軍徐帥往
大戰賊于東山生擒王三獻俘麾下軍門大說表授爲一品夫人
後與聖致仕歸隱居岵礪山中
外史氏曰女子稟柔德者也乃夫人儼然偉丈夫操戈當陣使賊
畏而避之惜乎當世不使獨將一軍掃除流賊也

長沙女子傳

長沙女子失其姓氏生而有膂力七八歲時卽能隻手擎石曰舞
動如飛父兄皆有勇善拳擊及少林梅花鎗試木版一刺而動五
孔以是長沙少年皆從之學武略門下生徒列三百人各授一技
皆精妙絕倫女子聰慧從旁觀諸門人學技一過目亦精妙絕倫

父兄絕愛之慎擇配最後有暨陽陳生者來受業弱冠美如冠玉
氣概吞牛挾兩銅鞭重六十斤父大說卽以女許字未結褵而流
賊圍長沙父兄壻帥其徒三百人與賊戰于西郊凡三日夜不怯
賊圍之三匝壯其勇以好言招之降父兄壻及其徒三百人皆曰
我輩皆良民也豈降賊者乎遂力鬪俱死及攻城城中官吏士大
夫皆棄城走女子知城將陷遂密紉衣禪以青布數丈纏其身持
戈立城上見父兄壻及門三百人俱歿于陣歎曰吾安獨生城陷
遂奮與賊鬪賊曰汝一女子何能爲女子曰吾將媿天下之爲男
子者遂挺戈力戰凡二日夜殺賊數百餘人所向披靡無有當者
賊帥大怖呼羣賊發亂矢射死

外史氏曰明末流賊亂湖南士大夫或降或竄無有敢與抗者乃

區區一女子義不獨生奮力戰死嗚呼烈哉

雲間妓傳

雲間妓失其姓氏吳門人也能詩善歌工繪事幼本良家子以歲
凶故淪落煙花與姊某同擅名吳越開門如市心不樂也無人時
嘗相對泣數行下姊曰吾年二十三矣轉盼卽三十若不乘此時
跳出樊籠至水窮山盡誰其憐我吾今歲必從良妹其早自爲計
妹曰吾亦在旦夕閒矣旣而姊果嫁貴公子久之貴公子宴客集
諸名妓妹亦與焉姊見召入責之曰爾豈忘夙昔之言耶妹曰妹
若欲嫁執粉兒則早已去矣奈何姊不知我乎乃去時包長明爾
庚尚困諸生破屋半閒獨居陋巷妓素聞其名微服往窺之大說
竊計欲以身許未及言而長明以乏食故遠館山左去矣妓乃盡
賣簪珥買舟夜遁抵淮購一驢易妝皮冠戎服佩長劍居然五陵
年少也達山左知長明在某搢紳家直登其堂請相見長明出告
之故長明大喜妓窺主人色異乃呼而告曰若有膽得容吾夫婦
吾卽安之不然還我包相公別圖他居耳毋駭異也主人乃留後
長明成進士名滿天下

外史氏曰豪傑之士阨于塵埃丈夫或未得而識也乃區區一女

子竟能識之與藥師之紅拂妓並驅千古矣
太原妓傳

明末山西太原有二妓一名盈盈一名旦旦皆能歌舞善琵琶而旦旦知書法有衛夫人之妙盈盈亦頗識字學于妹者也二妓生同歲盈盈長旦旦數日耳年十五六名噪晉趙開然皆懷從良志而旦旦之志尤卓越必欲得一豪傑之士而嫁之嘗私語其志于盈盈盈盈曰斯世安得有豪傑士哉苟有一二豪傑必能起而滅流賊矣吾第得一文章士足也時流氛正熾故盈盈感而及此旦旦曰不然天下之大億兆之眾豈無一豪傑士哉患在位者不能識而用之耳苟用之治四海也何有況么麼小醜乎遂相與物色之數年卒無遇乃相持大慟曰吾二人年十九矣此時而不遇可意人當斯亂世誰其適從乎未幾而流賊犯山西大破郡邑困太原太原破賊帥素聞二妓名下令徧求之三日乃得二妓至命歌以勸酒二妓大罵曰吾輩雖妓固賤人也然所交者皆士大夫

或良士今汝輩賊也安得辱我遂奪刃自刺而死
外史氏曰烈哉二妓不受賊辱而竟決烈以死可畏哉嗟乎人而為賊妓且不屑而況其他乎好為賊者可以自省矣

李家婢傳

吾邑李家有婢名杏芳者失其姓氏美而豔性端莊言笑不苟主母甚愛之主母生男子子二長三歲次二歲而主人死明年主母病篤語婢曰奈何主人早逝幸吾在可以撫二孤今若此旦夕休矣二孤無託惟藉汝汝其撫之四年使長者七歲次者六歲可以操匕著汝然後嫁則吾受若賜死且不朽婢泣曰主母勿憂也第自愛脫不幸婢當以死奉二孤母煩下室也又數日主母死婢哭甚哀為之殮且葬即撫二孤家貧有田五畝親操耒耕之暇則篤織紉勤緝績然坐必端立必正言不妄發儼然孀嫠也人望而畏之不敢稍褻李之宗族感之皆為之助以是孤得成立年弱冠矣或諷之嫁婢泣曰吾許先人死且奉孤今二孤尚未婚敢食言乎

又數年家小康爲二孤娶婦或又諷之對曰吾年垂四十以色事
人則衰矣吾將依二孤以終老矣卒不嫁年六十有二而歿
外史氏曰不食言者春秋稱荀息焉不意千百年下乃有李家婢
子守貞不字以撫二孤至老死可與荀大夫頡頏矣

徐氏婦傳

徐氏婦姓黃江陰人也順治乙酉年十六歸徐氏子甫月餘
大兵圍城游騎略山中執婦去爲白旗撥什庫某妻舉一子某復
從軍出時舅早歿惟一姑在婦念故夫甚切曲意事之謬曰新婦
本素封家亂離時曾以白鏹十瓮瘞密室夫死新婦被掠棟宇悉
火此項金沒瓦石矣誠得去而攜歸何患貧乏哉姑豔之曰果爾
盍遣人發之婦曰欲得此金非新婦行不可他人烏知藏所哉且
不宜僭僕從僭僕從則炫人耳目然我婦人安能遠出必易服往
還數月此呱呱兒誰字耶姑大喜曰子第行兒自吾撫母憂也婦
故戀戀兒不肯行姑促之再乃薙髮結辮變男子妝挾弓矢佩刀

策馬出都渡江抵家叩扉大叫夫從門隙窺則年少將軍也不敢
遽出婦遂排闥入踞坐中堂呼夫名夫不得已出見蒲伏不敢仰
視婦曰相識否夫曰萬死不能識將軍婦曰試認之夫熟視不識
也婦歎曰真不識也乃起直前抱夫痛哭曰妾非他乃君被掠婦
黃氏也具述易妝巧脫夫大驚喜復好如初以老

外史氏曰古節婦有引腕斷臂之烈今黃氏被略且生子不足道
矣然戀戀故夫數千里能以智脫歸節雖不足而義則有餘較之
馬上豔妝懽笑以行故夫求贖反詫之者非天壤隔哉

朱氏婦傳

朱氏婦者江都朱以觀妻高氏也有淑德父兄皆業鹺稱素封家
而夫貧婦棄華飾甘淡泊舉案齊眉有古賢媛風奉養姑尤能盡
孝道婉容愉色怡怡然如子之事親狀舉一子早歿婦遂染血證
治不痊竟不能孕日夜憂之及夫年將五十尚無子婦益懼惶惶
如有所失乃變妝匿脫簪珥爲夫置妾愛之如姊妹待之同妯娌

時時呵護之惟恐其一有疾而不成孕也久之不孕卽撫姪爲子
三年妾始舉一子婦愛若己出視之如命兒一有疾不食卽婦亦
不食兒食婦乃食其篤愛如此兒三歲患痘甚凶邑中兒患痘者
多死亡婦憂之甚傾囊篋徧求良醫治之不愈或言不治者婦日
夜悲號竟以兒之死生爲己身存亡焉祈天禱神無所不至兒乃
得痊婦文說然竟累月勞瘁故舊疾復作延三閱月而卒臨卒惟
屬家人以好生教養幼兒而已

外史氏曰古妒婦有甘飲鴆而不願爲夫置妾以生子者卒斬後
而無憾何其愚哉朱氏婦變妝匿脫替珥爲夫買妾以舉子而愛
逾己出誠古今不可多得者也且其事姑盡道可謂孝且慈者矣

毛女傳

毛女者河南嵩縣諸生任士弘妻也姓平氏美而且淑歸士弘閱
三歲而無子乃往禱少室行二十里度絕嶺方舍車而徒以休輿
夫忽猛獸橫逸平氏驚墜深谷士弘四顧皆千仞壁不可下大慟

而歸召沙門梵誦誓不再娶平氏旣亡三年里有張義向豎任家
往樵山中猝聞幽篁深箐閒婉婉呼張義者義大駭回顧見一毛
女通體垂黃毫長六七寸許因咋舌不敢語毛女曰我任家大嫂
何汝不相識也義驚曰大嫂固無恙乎何幸而得此曰我初墜緣
藤得無損旣而飢甚見交柯女貞子甚繁因取食味殊澀不可口
三日後則甘香滿頰三月乃生毫半載則身輕如葉任騰踔上下
矣第山中乏水惟此有泉渴則來飲耳不意得與汝相見義具道
任生哀慕狀毛女曰我已趨然輕舉與鸞鶴爲伍其樂何如肯復
向樊籠哉爲我謝任生早續姻盟以豐後嗣毋徒自苦也言已一
躍而往義亟報任生任生大喜卽偕義詣樵所取之伏草中俟三
日毛女果至直前抱之毛女曰誰耶曰夫也曰妾貌已寢君不足
念也曰我不嫌汝何忘夙昔之好乎因泣下毛女心動乃允之遂
輿歸初飲食腹微痛踰時而定半月毛盡脫依然佳麗也自是情
好益篤生子女數人歷四十餘年而歿

外史氏曰神仙可爲也使平氏當飲水時不呼張義則凌蹕碧虛
之上死生而無極矣何至埋身黃壤哉甚矣情絲之難割也

留溪外傳卷十六

留溪外傳卷十七

神仙部

彭望祖傳

彭望祖名遠江西人幼端方沈靜寡言笑弱冠舉諸生從師讀書
西山草菴中冬月有道士衣單麻衣冒大雪來求宿忽病足不能
起望祖憐之日分飲食奉之三年道士足愈起謝曰吾受郎君惠
厚矣無以報出丹書三卷授之曰讀之可證飛仙遂去不復見望
祖得其書熟讀之明亡棄舉子業來游江南順治中京口明經張
踐公延爲孺子句讀師賓主甚相歡他日飲青梅下行貞甚言閩
粵鮮荔之美恨不得啖望祖曰是固無難致也踐公曰噫先生何
云不難哉固無論山川險阻第相去數千里卽使策駿馬乘傳日
夜行至此亦槁矣望祖唯唯抵暮踐公入望祖命童子灑掃書舍
庀香具壇戒童子先寢童子慧怪之假寐竊起窺望祖于篋中取
草龍一具祭于壇須臾龍忽蠕然鱗甲爪牙皆動望祖乘之騰去

不半夜歸矣龍兩角挂纍纍皆鮮荔也乃撤壇收草龍置篋中而東方已白呼童子起進之踐公大駭詰童子童子具以告于是知望祖有神術謹事之歲餘望祖忽于午夜出草龍收行旅琴劍書篋挂于上乘之而去不知所終

外史氏曰神仙固多幻術也往往以幻術遊戲人閒第無緣值之耳或曰望祖特術士耳非神仙也雖然數千里不半夜而往還即謂之神仙也亦宜

愛鐵道人傳

愛鐵道人逸其姓名雲南人也少時曾爲郡諸生明亡即棄家爲道士冬夏無衣禪惟以尺布掩下體不火食所食者瓜蔬果瀆中四時皆暖雖臘月有鮮物故道人竟辟穀性愛鐵見鐵輒喜必膜拜向人乞之頭項肩臂以至胸背腰足皆懸敗鐵行路則錚錚然如披鎧自號曰愛鐵道人久之言人禍福多奇中愚男女皆以神仙奉之而道人亦遂以神仙自居更號曰愛鐵神仙嗜飲市人

爭醉以酒婦人持酒與則傾潑不飲或詰之則厲聲曰若不聞孟聖人云男女不親授受乎于是神仙之名四走有不遠數百十里來問吉凶時道人寄跡破廟日環繞門者數百人道人大怒罵曰我何神仙我貪酒花子耳知底吉凶汝輩來問我即擊穢撒之眾乃散與蜀中銅袍道人張開善銅袍者聯銅片爲衣而服之也故號曰銅袍道人嘗攜杖頭錢與愛鐵飲於市醉則歌嗚嗚大慟而後休甲寅亂二人不知所往

外史氏曰以鐵爲衣以銅爲袍豈炫異以駭人耳目耶抑道家別有所屬而寓意于銅鐵耶皆不可得而解也

李秀才傳

李秀才失其名雲南臨安郡人年十五舉諸生性端慤寡言笑里人皆敬畏之多使子弟受業焉明亡遂棄制藝人點蒼山學辟穀法十年成道復還家語其子曰吳三桂卽叛國矣若輩毋事不義遺臭萬世也其子曰諾明年三桂果叛其弟從之秀才大罵曰汝

不識大義不知天命他日墮水方悔也其弟不聽後果爲我師敗于楚墮辰溪中一旦夕方得免初三桂欲爲逆知秀才識禍福使人往問秀才卽掩面大慟或發狂笑或倒立而以手行或翻筋斗數十或大聲呼殺絕吳種子殺絕吳種子者不輟使者以爲顛乃去秀才則麻衣冠至會城日號哭於金馬碧雞坊下性好飲滇人皆知其能識吉凶爭迎至家飲之秀才亦不辭飲畢卽言其家吉凶罔不中如是者歲餘一日自買一棺坐于中募四人昇往市徧別各與飲之家曰吾明日死矣若等可送我于北郭明日昇至郭竟長逝矣及葬則棺空送者數千人皆大駭後月餘有人見其在雞足山

外史氏曰予讀列仙傳往往神仙多僞死如死于刀者曰兵解死于病者屍解云是誠不可解

孝鬼傳

孝鬼者福建侯官縣何西也生九歲父卒母年少家貧無瓶壘儲

僅瓦屋一閒易棺以葬父乃結廬郭外北山之麓日采薪易米以供母旣長墾北麓荒土藝蔬歲大饑惟何勤灌漑蔬得大熟貨錢三十貫以三之一廣廬舍以二之一聘婦以一奉母鄉人皆稱曰孝子未幾孝子以勤苦得疾卒母無以自活鄰人某欲娶之遣媒以告母將諾之是夜孝子之魂繞母榻嗚嗚作聲泣告曰母母嫁兒身雖死兒心未死也兒形雖與母隔兒神未與母隔也母驚泣告曰奈何失節豈吾素志哉然兒何以爲我謀鬼曰可追吾所聘婦貲母不如此不應何鬼曰我當語之卽夜果見異于婦家婦家懼倍償其貲母卽以自給者五載資盡復呼孝子鬼曰母母急吾亦能出力養母母曰兒鬼矣烏能以力養鬼曰兒有道卒去之北門內賣菜汪翁家大言曰吾有母居北郭無以活吾助汝擔可倍以入市多得錢穀分給吾母吾將佐汝以豐否則必崇汝汪懼明且試倍之疾走如平時且獲息三倍于往日卒分錢穀以給母母得以終老鬼佐之無閒汪果致家道豐

西漢夕傳十七
三
外史氏曰孝子生能盡子道死而精神猶周旋其母使不至于失身其孝也誠生死無閒者哉嗚呼可以人而不如鬼乎

劍客傳

朱珠兒者山右太原人也母夢神人授赤珠一顆光照四壁而生因名珠兒十歲就學外家歲暮解館歸至中道遇白髯老人攝入深山置萬仞懸崖之末授飛走擊刺之術期年身輕如葉可于屏風上行水波上立其飛劍也能斬人于五百步外百發百中十年三技成仍送還家時母已死父爲豪家所賊珠兒痛忿飛刺讐人于都市白首于吏吏受豪家金文致珠兒大辟乃遁跡浙東與會稽貴公子姜堯善後吏以貪酷論誅珠兒遂歸省邱隴而姜亦南游台雁值閩變山賊卒起道阻不得歸賊帥素知其材欲強之官姜曰吾父子受

國恩深恨書生力絲不能操戈殺賊盜官賊耶若等逆天反叛滅族之禍翹足可待而欲人陪戮西市誰其肯之賊帥怒卽縲縛軍

中曰俟吾下兩浙定江東平中原然後殺豎儒珠兒聞之乃從太原馳往救之遇吳生于旅舍吳生者山陰望族也父某爲某撫軍幕客甚寵信委以政事遂擅威福屬僚畏懼大獲賄賂生往省父父以黃白數萬金命之攜歸道經都門假館宣武門外買騎南旋將行前值大雪見珠兒被狐裘佩雙劍策蹇驢倉皇投宿其狀如美婦人光豔奪目甫入店卽呼主家索燒刀子一斗一生彘肩爲滄主家意多同侶如數具之及昏無一人至乃盡進之珠兒拔劍切肉豪飲大嚼須臾過半生初窺其風流雋逸心已異之及見飲食粗豪益驚怪乃從容詢其姓名問其行狀珠兒備述以告生曰今閩寇方熾金台一帶所在皆賊未可行也珠兒舉劍示之曰吾有此君賊雖多其奈我何語畢遂滿引邀生共飲生告曰吾明早亦旋浙苟不棄聯轡可乎曰不可吾騎日走八百里非君騎可及且吾前途期會要客尙多逗遛于中道相候君可兼程而進吾所宿旅舍壁閒必繪一鷹下識年月驗之卽知吾所過也如不及

則于淮陰市酒肆覓之吾必同君東渡可耳明晨並騎出彰義門里許珠兒于驢背拱手曰吾先行矣卽策蹇如飛轉睫失所在時冬至月望日也生以輜重故日行百里不及越十日始抵高唐見旅舍壁間果有繪鷹讀其識乃出都之夕也詢之逆旅主人云畫鷹客于此信宿候其侶不至已去八日矣始信其八百里之言不謬及抵淮陰果于市中酒樓得之握手大喜曰吾候君兩旬餘今乃至耶卽呼酒共醉生心羨其驢噴噴不置珠兒曰子愛之乎吾與子易之生曰固所願也非敢請耳曰大丈夫相合以義相知以心況一騎耶竟易之明且生欲試之蚤起與珠兒整鞍先發誠僕從後行期會江都意淮陽路隔三程不半日可到耳及就道驢竟不肯行珠兒又躁不可待乃于馬上語生曰汝不善乘吾不慣與汝乘請先驅于蜀岡相候遂加策飛馳如電生見其去若鷲鳥逐爵勁弩出矢不禁色然而駭盡力加鞭終不可及乃徬徨道左候僕從至偕抵江都而珠兒已于蕪城俟兩宿矣因告生曰行道遲

疾存乎人焉非在騎也果得其道雖淹蹇疲乘日可千里況良騎乎于是生知其有術一路再拜求教願以師事珠兒識其誠許之曰吾受姜氏恩今姜氏子爲賊困急欲往救今則不能大約在春鐙之夕當造君授之遂別去馳入賊壘脫姜之繫累而出賊聞遣鐵騎追逐箭發如雨不能中珠兒復飛劍斬數十賊下馬賊大懼而退乃歸新正元宵果至生家盡授其術而去生得其傳覓深山構靜室築壇壝備器具年餘告成擇于十一月甲子入壇舉事忽有江左客嵇姓機名者投刺請見邀入與語甚合且言善劍術出示其書與珠兒所授相符生大喜畱共事其法用鉛製一盒圍八寸中置小鉛劍兩口鉛凡子二枚封以九天玄女六甲靈符置壇下閉戶作法四十九旦夕術卽成二人入壇修煉至四十二日盒中九劍卽有聲如蒼蠅鳴相驚且喜益加精進及至四十八日之夕山中忽怪風陡作盒中聲忽變金鼓聲旣而連發大礮四十八響牆垣傾圮烈燄塞目諸物盡燬無一遺者而盒與九劍亦隨

煙火俱滅生爲礮火所薄衣冠鬚髮俱化灰燼成一墨炭人矣風
火既過嵇生呼其家僮扶入外室生口不能言惟張目嗅鼻搖首
點額而已昏臥三日始稍進飲食越數日變爲狂疾遽奔山巔舉
巨石拔大木距躍曲踊嵇生懼夜半逸去如是六七日乃愈家僮
賃輿昇回嗣後疾雖愈而耳畔時聞金鼓聲久之左右皆聞又久
之舉室皆聞矣召黃冠屢設醮餼終不能除後其父因撫軍被論
逮獄遁還掖重貨十餘萬廣居室構田宅權子母竭情縱欲而昆
季親戚乞一文不可得也及撫軍

廷論棄市父聞之且駭且愧忽耳畔亦聞金鼓聲震突發狂疾操
鐵杵自大門抵臥室凡而器用財賄以及門闥牆垣玩好花卉罄
行排毀靡有孑遺家眾懼悉皆竄去如是者七旦夕家毀而疾愈
期年生亦疾作如父父命家眾禦之悉受傷亦七旦夕家毀而疾
愈後父子更番疾作凡三作三愈而家去過半後一年父子疾俱
作子則操杵毀家父則舉火焚室生平之積悉付祝融然囊貲雖

盡而租賦尙存歲猶入息數千乃父貪鄙成性以百文舟稅逼長
年自盡訟之官竟死于獄生痛悔父子平生逆天背理乃盡散餘
貲與親戚鄉黨之貧者挾妻子入深山求仙朱珠兒聞之曰是可
以授吾道矣

外史氏曰吳生之父撫軍託以心腹委之政事不思圖報乃婪賄
至十餘萬則合屬之編氓苦矣其必家怨戶讐而呪詛載道也及
陷撫軍重辟已則飄然漏網人心能厭乎哉珠兒豪俠之士必憤
之痛之特以幻術愚其子又恐不能盡其束縛復使嵇生錮錮之
使其信之深而爲之力至于術無成而父子痼疾卒自毀其家百
萬蒼生之怨忿洩矣彼狡猾之徒爲人幕而孳孳爲利不顧人家
國者其益思之嵇生梁溪人子束髮交也自言曾受術于珠兒則
珠兒爲萬民洩怨也明矣嗚呼天下豈少有心人哉

厲鬼傳

汪時珍平江人也與劉文韜生同齒居同里幼同學長同游邑庠

交甚相善及汪生男劉生女又同日里人持湯餅交賀兩家謂天授佳兒佳婦也遂締婚未幾汪夫婦病疫篤以幼子并家財屬于劉曰吾本客籍無期功強近之親可以屬目藐茲遺孤惟藉字之吾目瞑矣遂卒劉由是持籌握算數年遂成鉅富乃納粟入雍以女改許貴兒汪氏子年至十五不使就學蓬首垢面露肘決踵與家僮爲伍甚至操畚鍤以就飲食劉終歲不使一見丁巳秋詔舉監生科劉希僥倖乃就東山僧舍肄業僧舍去其家不半里一夕鄰有郭氏子暴卒召僧誦經入殮師徒盡往屬劉守舍劉讀書漏深神思困倦憑几假寐陡聞颯颯颯從空谷來漸至菴前倏焉排闥直抵中庭燈昏月暗簷馬悲鳴牆篁慘戛竦焉驚醒遂心蕩神沮乃起而就榻下帷箕踞枕篔以候僧歸少焉聞門外有呼其名者既而聲漸迫細聽則故人汪時珍音也于是毛髮悚豎股戰肌栗斂手屏氣不敢出息頃之則拒門入室據榻前竹椅細數劉曰汝七八歲家貧就學吾家吾解衣推食未嘗或吝及長赴

郡邑試凡而舟車資斧吾與汝共迨補諸生汝巾衫脩脯不能措吾爲汝辦汝三十未娶吾助汝婚後結姻婭數年來汝不治生產而足衣食伊誰之力耶汝嘗指天地誓日月呼鬼神而告予曰吾頭敢斷心敢剖肝膈敢刳君恩不敢忘也言猶在耳抔土未乾將女改許奴隸吾子吞沒吾財負恩忘義狗彘不若天地鬼神森羅昭布尙思取科第倖爵祿榮一鄉耀一時耶吾在夜臺十餘年未嘗刻忘今來與汝訣生死在斯夕矣劉夫恐乃振衣從牖中躍出汪踉蹌尾後至殿愴惶迷惑不得其門回顧追捕又急乃大呼乞命繞殿而走汪復追逐不休至四鼓劉力竭氣盡僵仆于地汪倚殿楹恨罵不絕僧在喪家誦經畢將舉入殮則失屍所在徧覓不得合家驚訝僧辭神歸見劉仆地呻吟一人倚柱挺立舉火燭之則郭氏所失之屍也大驚報喪家并呼劉妻至以薑汁灌甦具言始末聞者咋舌遂輿歸數日而死無子妻亦相繼而卒貴壻亦殤劉之叔主其家仍以女孫歸汪子盡還其產

論曰汪劉總角相歡及長卽結姻婭可謂膠漆交矣何汪託寄以孤而劉貪利負義一死一生乃見交情信乎此汪之含恨地下不能須臾忘巧借鄰屍活奪其魄怨毒深矣嗚呼世之負心人能無畏耶

活死人傳

活死人姓江四川人名本寔家素封明亡散家財棄妻子入終南學仙十年得其道遂遨遊四海旣而止妙高峰從閩老人結廬煉金丹又十年丹成座下弟子百餘人推荆溪陳留王爲首能駕雲往來能水面上立能峭壁閒行嘗縛虎爲騎出入市申活死人怒呼而責之曰所貴乎道者清淨無爲也無爲而至于無聲方臻眾妙之門故曰有聲之聲延及百里無聲之聲延及四海今汝所行皆有爲也有爲則駭世惑俗豈清淨道哉于是陳留王乃盡棄其術掩關息坐三年然後請見活死人大說曰子可以授吾大道矣卽授乃集羣弟子告曰吾聞成功者退今吾道旣已得人吾將隱

矣乃命掘一土穴山半僅可容身活死人入居之命以土掩毋使有隙但朝夕來呼我可耳旣埋羣弟子如命朝夕往呼之活死人在土中必大聲應三年呼之不應矣羣弟子乃樹之以碣曰活死人之墓

外史氏曰神仙多爲駭世惑俗之事活死人旣怪其弟子駭世惑俗何爲活埋土穴而使呼之應之三年之久耶豈夫子所謂索隱行怪者卽世之所謂神仙耶

朱衣道人傳

朱衣道人者失其姓名不知何許人也或曰歙州人或曰宣州人或又曰山右人能四海方言及外國語逢何處人卽作何處聲故弗能一其籍自言年十六卽補諸生二十食餼二十二明亡卽棄巾衫爲方外游冠漢玉冠服朱縫掖躡白紵履佩五尺長劍負細頸匏瓜高八尺自號曰朱衣道人往來吳楚粵越黔滇閒賣能活死人藥風寒燥溼疥癬之疾不願醫也善步履自吳門抵京師七

日夜輒一往返好搏擊之戲緣壁行如平地躍而騎危瓦無聲忽
然屹立簷下不點塵置二尺竹于水面驅童子過之童子怖不敢
行身則先之往復數十過而履不沾濡然後驅童子從之亦然嘗
作紙鳶長數丈絡三小兒于上乘大風吹入雲表令兒擊金鼓半
空以為樂善飲飲未嘗醉于吳門市貯醇酒數十斛拉行道入其
飲行道者皆醉已則如故如是者七日夜別諸友他違不知所終
外史氏曰海內異人多矣紅綾隱娘崑崙之流勿謂今世無之也
若朱衣道人者神仙乎俠士乎吾不得而知之矣或曰是有心而
逐世者也然歟否歟

宿州道人傳

宿州道人章姓失其名宿州人也有幻術能役鬼神名柳青嘗為
之使明末至徐州冬月衣麻衣行大雪中見其汗浸浸然如六月
人多異之然未知其有術也又春日徐人多挈榼游南山道人至
乞飲徐人曰吾輩攜一尊酒耳飲且不足安得餘哉道人曰吾有

金但勞從者為吾沽來共飲何如徐人諾之道人隨地拾豆大一
石合掌授之即成白金付從者沽酒一壺至徧飲座客座客數十
輩皆大醉壺不竭而徐人所攜來酒竟未嘗也于是州人萬御史
者聞道人奇招至家久之請貸御史御史辭焉道人曰吾戲耳吾
有多金見置榻前安用貸為請視之則御史家物也封識宛然于
是御史大疑患為盜辭之去出與杜醫生輩十餘人結為酒友縱
飲歲餘還宿州未幾明亡道人死計聞杜輩十餘人往弔靈柩在
堂妻子皆衰絰出拜哀慟以謝皆以為死矣逾月杜輩所交往山
左見道人在泰山始知為化去不死也
外史氏曰仙家大抵縱酒為幻術以娛人既又詐死復見于他處
列仙傳所載多類此類此者人皆以為神仙

雌雌兒傳

雌雌兒者不知何許人亦未詳其姓氏自言崇禎孝廉也乙酉為
道士往來江陰無錫閒與予里黃介子琪毓善每過其家必袖一

刺大書年家眷弟雌雌兒頓首再拜投入相見必交拜別去必頓首衲衣外別無他物惟腰佩竹筒三大錢圍長五寸而已後游雲開雲間諸氏素封家也有空屋三百餘楹雌雌兒往僦之如數與之值既入鍵其戶獨坐堂上取所佩竹筒揭蓋傾之如芥子狀者躍于地不止須臾盡化椅桌幃帳器皿無不具既而復取一筒傾之如芥子者復躍于地須臾穀粟飲食牛羊犬馬無不具又以一筒傾之則妻妾僮僕婢媪男婦數百人皆集矣供奔走者除堂宇者整器用者頃刻如大富貴家諸氏從門隙窺之大驚以爲怪于是雌雌兒乘車馬擁僕從交游通國居久之諸氏以爲妖使人辭焉雌雌兒盡以妻妾僮婢器用牛馬之類納諸筒內飄然長往不知所終

外史氏曰黃介子高足徐佩玉弟羣玉爲予言雌雌兒高士也以幻術避世而世卒不容屢遭斥逐終遁深山嗟乎士生亂世道亦窮矣

九江王世子傳

李傲機失其字前朝宗室也明亡卽變姓爲道士隱居漢陽今已百有餘歲矣狀如二三十歲壯男子未嘗對人言見人輒笑人問之輒大笑工書法每書必署曰九江王世子欲求其書須美醞飲之大醉然後書不醉則終不書也然欲其醉非三石酒不可或有好事者竟醉以三石則呼天長叫握管疾揮輒數晝夜無倦既醒然後投筆去當事慕其書屢招之不往造其門輒遁去有顯者從滇還京道出漢陽求其見卽躍入大江伏水中二十餘日俟其去乃出與武昌顯道士魏知己善知己善言人禍福人爭與之多錢求其言知己止取二三十文供一日糧足矣餘輒揮去之不受二人嘗登大別山或黃鶴樓或言或笑或歌或泣人或迫窺之則又默然知己言人禍福多奇中人或有意微事人所不知或不可告人者知己輒先知之當面正其是非以是小人多畏之不敢狎近外史氏曰或云傲機本宗室而知己亦徐中山後二人俱有百餘

歲或見或隱忽南忽北蹤跡無定愚夫愚婦皆指爲神仙殊不知乃佯狂玩世多壽之隱君子也

鐵娘子傳

鐵娘子四川成都人明末張獻忠亂蜀恣行屠戮千里蕭然猶事誅殺初令羣賊以百姓首級獻計多寡論功及後則令賊殺男子以勢婦人以趾獻而請賞成都賸人皆驚魂喪魄憂死不暇一日忽有一女子自稱鐵娘子者乞食于市身長五尺餘顏色姣麗腰纏鐵繩一根長數百餘丈重數千斤自西門直達東關行一步則鐵聲錚然市人心肺皆蕩半晌乃平鐵娘子大聲呼曰鐵娘子失去鐵牛一頭重十萬八千斤報信者予錢十萬貫收留者予錢一萬貫突有少年僞言知牛下落鐵娘子大喜隨引登西山最高峰卒予錢十萬皆

世祖章皇帝寶號順治錢也少年大驚不敢取而返明早鐵娘子復入市大呼如前聲徹四城獻賊聞之以爲妖親率數千賊射之

矢如飛蝗卒不中獻賊大怖歸卽病既而中創死鐵娘子亦不知何往

外史氏曰獻賊之毒蜀也甚矣假令不卽死則蜀無噍類矣此天使鬼神先奪其魄也天道亦近哉

狗皮道士傳

狗皮道士者不知何許人亦未詳其姓氏明末嘗冠道冠躡赤舄披狗皮乞食成都市每至人家乞食輒作犬吠聲酷相類家犬聞之以爲真犬也突出吠之道士輒與對吠不休鄰犬聞之亦以爲真犬也輒羣集繞吠之主人厭之急與食而羣犬吠不絕道士怒忽作虎嘯聲羣犬皆辟易每獨居破廟至深夜輒作一犬吠形聲少頃作眾犬吠聲聲儼然百十犬相吠也久之通國之犬皆吠而達乎四境矣歲餘獻賊入寇道士突至賊馬前數十步大作犬吠聲獻賊怒令羣賊策馬逐殺之道士故徐徐行賊數策馬馬不前獻賊益怒令飛矢射之如雨皆不中獻賊益大怒以爲妖親策馬

射之中其首不入矢還中賊馬斃獻賊大駭乃已他日獻賊僭尊號元旦朝賊百官忽然道士披狗皮列班行執笏作犬吠聲獻賊大怒令羣賊縛之道士乃大作犬吠聲盈庭如數千百犬爭吠狀聲徹四外合城之犬聞聲從而和吠之聲震天地獻賊大聲呼眾皆不聞爲犬聲亂也獻賊大驚而退既退犬聲息道士亦不知何往

外史氏曰世之言神仙者比比余則疑信相半今觀狗皮道士之作爲豈非神仙哉不然何侮弄獻賊如襁褓小兒哉

心月道人傳

心月道人者楚之鄢縣人也姓譚名守誠心月道號也爲兒時相貌不凡嬉于庭有紺髮朱顏黃冠客負蒲團策杖過其廬見而異之曰此子骨氣異常他日可肩吾大道也語畢忽不見家人皆怪之明亡遂棄家爲道士徧游名山勝境求訪高賢歷訪名宿頗有得一日遇王崑陽真人相見如故遂契合偕往武當山中傳祕密

精義操修二十餘年無晷刻少懈崑陽知其有所得遂以龍門心印付之屬曰爾得吾道當以度人爲急度一人證道卽積無量功德也于是守誠游行天下以救拔爲主委曲勸化誘人于至道丁盜告誡勿使墮落旁門左路也後至江南見江左人材濟濟有根器者眾乃止于江寧城西虎踞山之隱仙菴設教焉誨人以忠孝爲本以誠靜爲用其徒從者幾千人康熙己巳歲語諸學人曰吾將逝矣當在某月日也至期沐浴更衣朝參上帝說偈曰一心靜極萬緣消獨露真容月正高自在希夷堪湛寂龍門法律柏林操端坐而化得其學者蓋黃州詹太林晉柏也


外史氏曰明亡以來高人達士多隱于黃冠緇衣之流不肯以才見用于當世惟求歸潔其身而已若心月道人者是也

天妃宮道士傳


直隸天津衛天妃宮道士上官常明者不知何許人也平生端慤誠樸無纖毫僞行全真功年六十餘一日命其徒購壽缸一具昇

之庭道士喜入缸坐而試之曰正好亦不須擇日以炫世去了罷
卽瞑目長往矣其徒以缸停于室中三年其師弟素無行好飲欲
舉其屍瘞之士以缸易酒及啟寂無屍焉大驚遂患毒瘡徧醫不
愈天津有客吳門者歸省遇道士于淮陰市中客素識道士因問
何日離天津道士答曰三月某日客出銀五星齋道士道士授以
方曰予師弟患瘡乞付之命依方修治卽愈也遂別去客抵家過
天妃宮詢其師弟師弟告之故始知啟缸之日卽道士所云三月
某日也周德鋒者字思永號占月江西南昌荷湖人博學工詩文
出仕明亡棄官爲道士徧游名山與徐野鵠友善相與爲道義交
游廣陵太史許師六承家以師禮事之皈依者甚眾皆教之忠孝
年七十六預定死期端坐而化葬于金泉之麓後有友人從武當
來道遇德鋒云入終南乃郵書于其徒云友人歸始知其仙去也
外史氏曰上官自了漢耳若德鋒者則以度人爲事者也且其教
人必本忠孝曰天上無不忠孝神仙學者當以忠孝爲本則長生

有基矣此許太史所以師禮事之也



留溪外傳卷十七



留溪外傳卷十八
緇流部

囂囂和尚傳

囂囂和尚金陵人少有至性事二親盡色養既長善屬文補博士
弟子員天啟閒親歿值貂璫煽禍毒流四海知天下將亂遂絕意
進取棄家爲僧結茅天闕山中種芋自給號囂囂和尚云與郡紳
某爲刎頸交某屏居林下不交一人獨與囂囂時棹舴艑往來江
上飲酒賦詩爲樂甲申莊烈殉社稷囂囂聞變仰天長號趨告某
曰國破君亡大變也相公世受國恩義當死某起欲入囂囂作色
曰死卽死耳毋庸入也某曰請與妻子別囂囂大慟曰嗟乎天乎
爲人臣者國爾忘身奈何有妻子哉奈何有妻子之別哉吾恐一
別妻子便萌眷戀念生畏死心害天下大義不淺矣平日之談忠
義何毋庸入也拉之呼其妻出告之故妻曰諾良人死國妾願死
良人毋庸緩也某于是泫然再拜曰從此與和尚辭矣囂囂曰噫

誰謂而公偷生者耶乃結纆三于屋梁先令某妻縊次掖某縊然後自縊俱死家人葬于天闕之陰溝其旁附以囂囂至今謂之三義冢

外史氏曰隱姓氏棄妻子自號囂囂似不知有君父者及臨君父之難慷慨激烈視死如歸烈矣哉

呱呱和尚列傳

呱呱和尚名已幻字三三不知何許人亦未詳其族氏明亡嘗攜百斤鐵錘往來江浙豪貴家教少年搏擊時更姓易字人莫測其蹤跡也與蕭山人王介右喻非指三人善嘗挈觴坐高峰頂痛飲放歌醉則大哭而反蕭山人者會稽蕭山人也名中素字芷崖能詩弱冠游邑庠文冠諸生國變隱雲間爲棺槨匠嘗持斧豪吟人目爲狂後有物色之者偕介右避入東海不知所終喻非指名指豪公子也重氣節有肝膽鼎革後卽棄家浪跡江湖沈酣詩酒其游金陵詩曰薜衣搖曳幅巾斜來看城西好物華有限夕陽無限

恨三分春色十分花朱樓大道連山麓紅袖清尊隔水涯何事帝鄉游冶處騎兒調矢正飛沙當年樓櫓繞黃旗不覺衣冠與世移吳苑陸機才入洛梁家江總又過隋澄潭日落通潮氣曲檻風多礙柳絲良會莫增今昔感道邊燈火是歸時兵革多銷故舊稀剛畱角里閉巖扉兩朝風雅歸班管十載雲蹤著羽衣初定甲庚皆合道昔游湖海盡忘機我來作客君應笑頭白如何下釣磯每言及明事無不垂涕嗚咽後更姓名與呱呱俱老于江左外史氏曰有明養士三百年旣隆且深國亡布衣之士往往懷之不置若呱呱喻指輩終其身未嘗乾淚焉非養士之隆不至此

筆架和尚傳

筆架和尚者卽筆架太守江寧蔡屏周也字二白萬曆乙卯孝廉性耿介初尹浮梁以廉潔著四民愛之時宦者魏忠賢權傾天下海內莫不爭媚撫軍某皆出其門遣役齎令命屏周建生祠以說之屏周大怒呼役告之曰爾主讀孔孟書成名進士作朝廷封疆

大臣當以直道事明主以方正督屬吏以廉恥風百姓何可詔諛
宦官宮妾而欲建祠立祀遺笑天下後世此必無之事也乃爾曹
假其威令希射利來耳痛杖之而遣撫軍慍撫以他事奏緹騎來
逮百姓罷市旬日日哭于撫軍之門者以萬計終不得救乃行至
涿而熹廟已崩遂得解莊烈立補兵部職方郎温相國器其材欲
以吳興守用冀其酬私恩而庇家室也密令人先告之屏周曰果
爾吾當鋤強植弱以報相國知我聞温氏子弟多暴政必先及則
一郡不難矣温大懼乃改守雲中處以邊險絕地既抵任值內臣
張彝憲行邊清餉威靈顯赫百官畏懼趨承恐後屏周獨不禮他
日偕同官三人以事進謁相戒抗禮及入二守不覺膝之屈而匍
伏于地矣惟屏周挺然獨立于中若雞羣鶴焉彝憲怒叱之屏周
曰我輩士大夫豈肯屈膝爾刑餘之人乎且爾奉朝廷命清餉來
耳非奉朝廷命爭體統來也終不屈故人號曰筆架太守監軍宦
官某受人金欲枉人法素知屏周崛強不敢言乃屬直指直指曰

吾命彼無不從也然監軍大有難色深患事決裂不得金不寐者
數夕直指意屏周必從而言可驗也伺其理之日置酒成樓召監
軍飲令從者偵探相望于道既而偵者來告曰已杖四十矣問杖
者誰曰行賄者直指乃失色監軍至泣下不歡而散遂銜思報之
屏周卽挂冠歸高臥鍾山者數歲福王建國金陵復以職方起命
督師山東敗大敵左良玉反撤回拒之太破其軍于皖國亡逃于
禪仍岸然自處人共呼爲筆架和尚云
外史氏曰當魏璫煽虐時天下莫之敢撻屏周以一縣吏乃明目
張膽以忤之幾至殺身而不悔及守雲中復以崛強忤璫豈其桂
薑之性愈老愈辣者耶此太守和尚皆以筆架稱而終其身也
性因和尚傳

性因號澹歸姓金名堡浙江人前朝丁丑進士明末爲諫官永王
時以言事杖戍清浪遂爲僧時虞山瞿式耜稼軒以相國畱守靖
江江陵張同敞別山以學士總制粵西國勢日蹙勛舊俱棄城走

庚寅十一月初五日定南王率師至二人皆被執式耜乃草密奏
申奏于朝而死其略曰臣本書生未知軍旅自我上元年謬膺
守之寄拮据四載力盡心枯無如將悍兵驕勦鎮諸臣惟以室家
爲念言守言戰多屬虛文逼餉逼糧日無寧晷臣望不能彈壓才
不能駕馭請督師而不應求允放而不從至于今秋灼知事不可
爲呼籲益力章奏數上而國家漠然近十月十三日集眾會議按
括懸賞方謂卽不能戰尙可以守忽于十一月初五開國公趙印
選傳興安塘報一紙知嚴關諸塘盡以歸去當卽飛催印選等星
赴子營而印選踟躕不前臣竊訝之詎意其精神全注老營止辦
移營一著午後遣人再偵則已盡室而行并在城衛國公胡一青
寧遠伯王永祚綏寧伯蒲英武陵侯楊國棟寧武伯馬養麟各老
營俱去城中竟爲一空矣臣撫膺頓足曰朝廷以高爵卽此輩百
姓以膏血養此輩遂作如此散場乎至酉刻督臣張同做遙知城
中已虛無人止臣在內遂泅水過江直入臣寓臣告之曰城存與

存城亡與亡自丁亥三月已拌一死吾今日得死所矣予非畱守
可以無死盜去諸同做毅然正色曰死則俱死耳古人恥獨爲君
子君獨不容我同殉國難乎卽于是夜明鏡正襟共坐臣之僮僕
散盡止一老兵尙在夜雨淙淙遙見城外火光燭天城中寂無聲
響至雞鳴守門兵入告臣曰定南兵已圍各門矣天漸明臣與同
做曰吾二人死期近矣辰刻噪聲始至靖江府前再一刻直至臣
寓前臣與同做危坐中堂屹不爲動忽數騎挾弓矢突至臣前執
臣與同做而去臣語之曰吾等坐待一夕矣毋庸執遂與偕行時
大雨如注臣與同做從泥淖中蹣跚數時始到靖江府時定南孔
有德已坐王府矣靖江父子亦以守國未曾出城業已移置別寓
不加害惟見甲杖如雲武士如林少頃引見定南臣等以必死之
身不拜彼亦不强臣與同做立而語曰城已陷矣惟求一死他復
何言定南霽色温慰曰吾在湖知有畱守在城中吾至此卽知有
兩公不怕死而不去吾斷不殺忠臣何必求死甲申闖賊之變

大清爲先帝復仇且葬祭成禮固人人所當感激者今人事如此天意可知曷不降乎臣與同儞復語之曰吾二人昨日已辦一死其不死于兵未至之前者以城在耳今城已亡吾二人敢言生乎願乞一死可耳定南卽遣人安置一所臣等不雜髮亦不强只今彼兵已克平樂陽朔等處取梧祇旦晚聞臣涕下霑襟仰天長號曰吾君遂至此極乎當年擁戴初心本以國統繼絕關係一綫不揣繇力妄舉大事四載以來雖未樹有寸功庶幾保全尺土豈知人謀舛錯天意難窺歲復一歲竟至于斯卽寸磔臣身何足以蔽負君誤國之罪然纍纍諸勛深受國恩敵未臨城望風逃遁大廈傾圮固非一木所能支也臣灑淚握筆具述初五至十四日以內情形仰瀆聖聽心痛如割血與淚俱惟願陛下暫寬聖慮保護宸躬以全萬姓之生以留一絲之緒至臣等罪戾重大自知青史難逃惟有堅求一死以報隆恩以盡臣職天地鬼神實鑒臨之臨表何勝嗚咽復作浩氣吟八律句張同儞和之乃俱就戮屍棄于

市無有收者性因和尚聞之乃上書定南曰山僧梧水之罪人也承乏掖垣奏職無狀繫錦衣獄幾死杖下今夏編成清浪以道路之梗養痾招提皈命三寶四閱月于茲矣車騎至桂咫尺階前而不欲通蓋以罪人自處亦以廢人自棄并以世外之人自恕也今且有不得不一言于左右者故督師大學士瞿公總督學士張公皆山僧友也已爲玉所殺可謂得死所矣敵國之人勢不並存忠臣義士殺之而後成名兩公豈有遺憾于王卽山僧亦豈有所私痛惜于兩公哉然聞遺骨未殯心竊感之古之成大業者表揚忠節如出天性殺其身而敬愛其人若唐高祖之于堯君素周世宗之于劉仁瞻是也我明太祖定金陵于元御史大夫福壽旣已葬之矣又復立祠祀之其子犯法當刑又曲宥之盛德美名于今爲烈至如元世祖祭文天祥伯顏卹汪立信之家豈非以聖人禮教其植彝倫者耶山僧聞嘗論之衰世之忠臣與開國之功臣皆受命于天同分砥柱乾坤之任天下無功臣則世道不平天下無

忠臣則人心不正事雖殊軌道實同原兩公一死之重豈輕于百戰之勛哉王既殺之則忠臣之忠見功臣之功亦見矣此又王見德之時也請具衣冠爲兩公殮嬰公幼子尤宜存卹張公無嗣益可哀矜並當擇付親知歸喪故里則仁義之譽王且播於無窮矣如其不爾亦許山僧領屍隨緣藁葬揆之情理亦未相妨豈可視忠義之士如盜賊寇讐然必滅其家狼籍其肢體而後快于心耶夫殺兩公子生者王所自以爲功也禮兩公子于死者天下萬世其以王爲德也惟王圖之物外閒人不辭多口旣爲生死交情不忍默默然于帝王澤及枯骨之政聖人維護綱常之教釋氏冤親平等之心一舉而三善備矣山僧跛不能履敢遣侍者以書獻敬候斧鉞惟王圖之書上定南許之性因遂負兩公骨歸厝焉外史氏曰性因值洵洵之際不爲苟全計挺然上書求兩公屍歸葬可謂篤于生死交情者矣

二雪和尚傳

二雪和尚名行幟族姓林其先福建莆田人宋乾道中始祖文質徙居浙之瑞安長子正仲中淳熙進士正仲十二世孫大壯生守身守身生得昭得昭生增志字任先號法幢者卽二雪也其曾祖祖父皆天曾祖母徐祖母陳母江三世皆青年守節和尚幼穎異事母至孝天性端方弱冠游邑庠從永嘉馬聘君講學得聖賢傳心之要屬文務根性命不尙詞藻萬曆乙卯舉于鄉母死哀毀骨立幾不欲生三年悲痛如一日也崇禎戊辰成進士初任湖廣蒲圻令政尙廉靜不事苛擾先教化而後刑罰逾年邑內大治訟簡庭閒日率諸生講學文宮鄰邑子弟趨聽者數百人庚午癸酉兩分楚闈俱稱得士三年循良之聲上達擢翰林編修在朝與黃道周倪元璐諸君子最深契未幾特遷東宮講讀時國事日非言路壅塞乃進易卦講章隱爲諷諫觸當道忌中以他事降三級于是公論不平掌院黃景昉冢宰李日宣皆抗疏請復遂晉侍講經筵兼起居注尋轉少詹終日懃懃懇懇于章句之間冀得一格君心

反亂爲治奈天命已移甲申闖賊犯闕國破君亡惟有仰天長號
椎心泣血而已及賊欲逼從酷刑幾斃終不肯屈賊遁南還與史
可法共圖國事時馬士英當國素知其材數召見與語多不合心
知必敗日夜憂之及可法薦以禮部起用識不能容遂稱疾固辭
旋里未幾唐王起閩堅以內閣徵旣而唐王走粵知大事已去乃
就呂峰逾遵長老剃度爲僧我
朝大一統徵用天下遺老和尚獨不奉檄有司迫就道欲自殺其
少室董氏聞而患之飛遺以書曰公讀書破萬卷不達經權常變
之道乎夫大明之仇讐者李賊也爲烈皇報讐殺賊者
大清也試思當年國破君亡滿朝臣子誰能討賊
大清君臣杖義入關一戰滅賊中原無主遂登皇極與竊天下于
孤兒寡婦之手者不啻天淵也若曰滅賊之後仍完故璧此則堯
舜所病諸而湯武決不肯者矣當日南國君臣能如東晉南宋戮
力綢繆亦可偏安江左少延宗社卽或有師旅之加而我多備禦

之策烏能飛越長江天險哉乃于艱危萬狀之時以酒色荒淫爲
事賄賂苛斂爲政江東百姓疊遭荒旱僅存皮骨奚以堪此其得
安流而渡一鼓而定者殆天與之也昨聞檄召公欲自殺烈則烈
矣而謂合于經權常變之道則未也如曰不事仇讐則

大清非仇讐有德于大明者也假令今日李賊稱帝豈惟公哉妾
亦早蹈東海而死矣夫忠臣不屈膝二姓之主烈女不褻體二姓
之夫萬古綱常不可忽也公欲守茲大節莫若往愬巢由之志當
事未必不許也如其不許然後死之亦不失從容就義古人謝疊
山已行之矣書達和尚卽以方外服色赴請從所願果蒙放還乃
于甬東大梅山中結茅以隱躬鋤而食摘蕨而蔬不見時人面者
二十餘年至康熙丁未秋得疾命其徒召集諸子告曰吾生平只
欠一死今死可勿葬當棄諸溝壑以飽鳶鳥狐狸示天下後世爲
人臣而不死國者言訖一慟而絕年七十四其徒以僧禮葬于甬
上之白門橋李霽崙和尚題其墓曰嗚呼有越二雪禪師之墓從

其志也

外史氏曰有明國亡諸臣迎賊恐後操志者數人而已若輩熟讀詩書平居輒談忠孝臨難祇圖富貴若二雪和尚者不可多得也至其臨卒數語其心亦可悲矣

也是和尚傳

也是和尚者名自非字普然族姓鄧名凱江西吉安人其先本河南新野籍祖某官豫章遂家焉凱膂力絕人善用長矛重百斤刺人馬上疾如鷲鳥性剛介不肯俯仰人明末與閣部楊廷麟大魁劉同升中丞郭維經督師萬元吉銓部龔棻起兵于贛兵敗諸君子死之而元吉棻以二子託焉乃共匿于楚攸邑越明年父某被殺潛歸殯葬復集眾興師又敗績遂散壯士伏吳楚間數載皇皇如喪家狗親識見之懼其遺禍無有敢與立談者知永王在滇冒險歸之丙申冬入武岡爲孫可望兵梗匿永寶山中歲餘至戊戌二月抵滇命畱扈從守前門十二月滇省告警桂王出奔令護衛

王子賜金幣晉爵右都督己亥正月抵永昌追師甚迫不敢駐二月十八日至騰越時從官止四百餘衛士僅三千人李定國白文選輩尚擁重兵爲宰臣馬吉翔宦者李國泰交構爲奸皆不得展二十四日申刻聞警吉翔多輜重患被掠催亟行昏夜進發失道左旋右轉達旦尙在原所而各官眷屬多亡姬御半爲追師所獲而吉翔物貨如故凱前後馳敵王子乃保及曙遵道方行又爲孫崇雅驅兵橫截不及者多被殺王子幾獲凱挺矛力戰始免次日扈從將軍靳統武已從開道不知何往矣二十八日入緬關抵蠻漠緬人迎頗有禮乃駐凱與沐國公皇親王維恭內臣李崇貴計挾王子入茶山爲犄角勢永王不允乃止三月初四日緬人備舟楫于河舟甚少不能俱載吉翔國泰黎明奪舟先行初八日永王方濟其餘由陸迂道而進十八日至井梗緬人阻之云爾兵四路而來恐有他變請速安之永王問誰可行者眾各難之凱奮然欲往進曰今日事至此臣等一死何辭旣而兵退乃止凱復與沐國

及總兵王啟龍輩集議大樹下言緬酋疑我日甚毋深入可走護
勒撒孟良地尚足自保吉翔大怒曰如是我不管把官家交付爾
等眾皆默然而散越日偵探來報乃知白文選軍初六日卽至阿
哇城去駐處止六十里因不知永王所在故不敢進陸行者至阿
哇緬人疑之發兵盡殺壯健老弱分散各村總兵潘世榮降通政
朱蘊金中軍姜承德等不屈自縊死初吉翔入關假令旨一道與
緬隘官曰業已航海後有一切官兵毋使入關盡殺可也故李定
國白文選軍至皆閉關拒之卒不得入五月初四日緬人差官備
舟楫鼓樂來迎初八日至者梗駐札卽陸行者被害之地也去緬
城六十里架茅屋數十間編竹爲垣分東西二門各官俱結竹爲
舍緬人進物甚隆永王亦厚賜使者居月餘者梗成市而諸臣以
爲樂國俱縱肆無忌矣緬俗貿易多婦人皆結廬列肆于左右吉
翔暨各官短衣跣足溷入彝婦交易物有新異者卽攫而奪之或
竊而取之于是緬人皆輕之私相語曰原來中朝大臣如此規矩

安得天下不失凱聞乃使行人任國璽上言乞設廠崇官以鎮而
有力如故無勢小員家與有隙無犯亦尋事鞭扑每晚巡邏各官
前張燈炬後挈觴饌遇可處卽暢飲投博誼呼之聲達曙不息八
月緬人招沐國入城令以彝禮見禮部楊在行人任國璽各劾不
合俱畱中秋永王病足呼痛不已諸臣高結四亭每日歌飲置
之不聞吉翔國泰夜飲王維恭家欲出其梨園勸酒維恭呼至有
優人黎應祥者粵東人也告曰此處逼近于內且上臥病叫號甚
切此何時也尚可作樂搬劇乎卽殺我亦不忍爲之吉翔怒痛批
其頰乃散蒲英居西門結廬開博肆呼盧之聲騰沸王維恭與內
豎楊二爭賭互毆至毀衣裂冠永王聞之怒止之不聽乃令錦衣
牙將毀其廬詎東拆未完而西蓋又成仍賭如故九月緬人進穀
命分給貧者吉翔以愛憎散凱不平大詈其庭吳四勸凱凱失足
傷不能履自謂必死乃上書訟父死難狀永王准蔭一子七月緬
人又來招沐國辭不往使者曰此行不似前局可冠帶去自以優

禮待也乃知各營又將近城矣九月晉軍迎書至內云前後二十餘書未知到否臣不敢輕進者恐緬人加害耳可與緬約何地交送云云詎諸臣處堂自安不計出險晉軍見無動靜不得已移營而去護守緬官私語凱曰爾家諸臣全無為主之念當與我國計贈其象馬糧草恢復地方何可惟事擄掠割人鼻斷人手以失人心乎凱歔歔垂涕乃上言曰乘今兵馬尚可整頓殺出險地與晉鞏二軍合庶幾猶可圖也若日復一日祇樂眼前緬未可恃且有利害何也我軍日事殺掠緬心已失一旦變生肘腋必至夷滅無存吉翔大怒乃擬狂言鼓眾殊屬可惡本應重處姑念扈從勞免究之批永王改批該衙門知道時有潘潢者通緬語最陰險吉翔令其偵探以女許之屬其日報某營駐某處某兵離此路若干皆飾言相誑又得厚賜楊任吉翔之婿不時報亂曰某兵若干駐某地某人反了某軍已抵某處離此數十里耳毫無影響內外通同欺上侮下吉翔外示謙恭收羅羣小御史鄔昌琦初甚耿介既而

吉翔密奏轉河南道兼掌六科事賜金二兩遂為吉翔心腹烏撒知府王祖望知醫時召入用藥吉翔畏其剛暴私以禮部主客許之吏部不解以戶曹上祖望怒唾罵于吏部門吏部詣問吉翔曰可以某銜覆之則息爭矣如之祖望果說太常博士鄧居詔上言請停不急之務內譏吉翔及各員自媒自銜吉翔怒批該衙門知道及任國璽甫回道升轉之令即下居詔不忿劾國璽國璽亦劾居詔二人相持召面質各跪中庭亦不令見吉翔國泰傳言切責居詔而退吉翔每有舉動國泰必預為地視永王如九弄諸掌上後永王知其奸乃恨曰吉翔國泰二奸賊爾要收門生以我做人情多受各員金所舉皆匪類賭博飲酒無所不為醉則攘臂脫帽相毆唾罵全無體統吏部尚書鄧士廉不思進士出身當此喪亂正應挺身為國乃惟事諂諛吉翔曰某人應升則曰然某官應降則曰是且離此不遠每晚同妾暢飲高歌全無顧忌誤國者吉翔士廉國泰也然不能去豈非天哉吉翔弟雄飛助兄為奸諸事不

關通萬不可行禮部侍郎楊在見吉翔所爲不端切齒恨之然亦無可如何也凱見王子廢學密與任國璽計請出閣開講許秋涼舉行至期不舉國璽與吉翔辯論一日次早忽傳任國璽有何書進覽乃呈宋末通鑑賢邪纂要一冊吉翔大怒以爲刺己永王止閱一日密令國泰抽出典璽李崇貴原益府內官也教讀于內每語人曰歷代國家都壞在我輩幼伴東宮不導以正他日居位必不以德蓋譏國泰也國泰深銜之辛丑二月二十八日白文選密遣緬民齋本至內云不敢遽進恐緬加害務要緬人送出爲策答云在此度刻如年當出奇兵接之切切不五日文選軍離者梗止五六十里造浮橋准渡矣遲數日緬人以浮橋斷纜來云已去矣三月內有恃血氣者數人密約凱及錦衣趙明鑑探知晉兵離者梗不遠欲挾王子殺出斬吉翔國泰以謝國二人覺誣奏其結盟投緬著錦衣密拏沐國家丁李某王啟龍家丁何愛命其主各處死先在滇時沅江那土官欲得總督勅開緬甸爲一省以備不測

議餽吉翔八千金竟不預聞國泰事遂不成乃蒲英居閒曾代那土官墊百金以進吉翔者至是英欲索歸而吉翔不吐遂反目幾至操刀眾官處半乃息五月吉翔國泰日侍于內不知何事人問之則曰講書任國璽乃上言曰時事三不可解上年請開講期年不行今日禍急然眉不圖出險君臣宴安若係講書必須科道侍班議軍務則有沐國公波皇親等豈吉翔國泰之獨君也言辭甚切乃批任國璽獻出險策來國璽復上言能主入緬者必能主出緬今日時勢至此則又卸肩于建言之人豈謀國者之若是乎于是禮曹潘洪王祖望博士鄧居詔大理寺齊桓刑曹王名世副將張龍先後各劾吉翔國泰表裏爲奸以調燮爲彌縫視賄賂爲進退乞卽罷斥以快人心以回天意竟不省乃轉楊在爲王子講官在要坐講允之在見典璽崇貴侍不便坐乃均賜坐崇貴辭曰今雖處亂離然禮不可廢知者以爲上賜不知者謂臣等妄也每遇講崇貴卽避出五月二十三日緬人殺兄奪位來求賀禮眾不允

凱進曰處人之國當以和好爲本今不允其求必老羞變怒謂我以弑逆視之也將生他心焉願允之吉翔曰我不能正其罪愧矣反賀之令彼視我朝爲何如人耶使者慚而退于是緬心貳矣七月十六日緬使來請當位大臣議事眾不肯行越日緬使又來曰此行無他我國慮你朝有他意請飲水盟誓酒耳日後便可往來交易你們日用也難豈可不往十九日吉翔國泰無論大小文武皆拉行不畱一人侍惟凱足跛且心惡之故不欲偕行去後卽有兵三千餘來圍者梗大呼曰爾等好漢都出來不出者亂鎗打死久之眾出則二十人擒一人盡殺之凱不離永王左右乃得免永王與中宮欲自經凱曰上死固然奈太后在何乃止眾兵入內搜取金帛二貴人及各官妻俱自縊滿屋懸挂慘不忍觀忽通事與守護官入喝曰不可傷老皇帝乃請入沐國舍中餘人札大小二百四十八擠作一樓居之母嘯兒哭慘聲震野日暮緬僧私送飲食至乃知先去各官悉被害矣沐國公及將軍魏豹總兵王啟

龍王昇各傷緬官數人而死王維恭家僮來安者年十三兵欲挾之去乃給曰我有金與爾俯首取金卽抽小刀刺殺一兵自到而死吉翔國泰叩頭乞命緬人因此大壞人也速殺之眾刃爲醢次日修理原房仍請永王入居進米鹽蔬菜鋪蓋等物曰我國實無此念因天朝兵馬各處殺掠民恨入髓眾有此舉也飲水死者四十一人沐國公王維恭四川則太常博士鄧居詔浙江則禮部侍郎楊在皆直臣也福建則禮部儀制司郎中裴嘉謨江西道御史任國璽江右則禮部主客司郎中王祖望皆敢言士也郭璘龔勛亦江右人江寧則靖東將軍魏豹丁調鼎四川鄧士廉貴州鄔昌琦廣西則楊生芳潘瑣陝西則總兵王啟龍湖廣則總兵陳謙宋衡湘劉湘旗鼓吳四廣西崇善人也每以直言諫吉翔者順天則錦衣任子信劉廣良張拱吉失其籍者則宰臣馬吉翔姪雄飛蒲英齊應異總兵王白金總兵王昇二人皆廉潔有品者宋華松滋王吉王昇張伯宗內臣李國泰楊大楊二李三曹監周監沈監

盧監王子典璽李崇貴乃江西建昌人也死者梗者則二貴人吉王同妃皆自縊松滋王有一妾旬日可婉妃令縊死乃自到王國璽偕妻及內官陳德遠等大小才八人皆經死江西宗室朱義漆錦衣趙明鑑總兵姚文相李司理姪度熊愛之黃華宇宋國柱王國相王大雄吳承胤鄭和尚凌漆嚴麻吳千戶皆衛員也茶陵守備羅大勇尹襄俱自經死婦人從容死者總兵王啟龍妻妾自經內官李猶龍救之叱曰爾與我夫善當連我死乃欲使我受緬汚乎俱死閣部中軍姜承德妻楊氏先將幼子縊死然後自經吳四妻預以幼女縊死人問之曰我死此小物何人照管畱作蠻子妻不若死又旬日乃自經大理寺卿齊桓妾葉榆人也年二十桓卒遺腹一子欲死不得聞一日負子同眾婦觀水乃曰我去矣躍入溪中死馬吉翔第四女自經數次俱為左右救免日泣曰我父存日不知所為何事乃今人人唾罵乘閒自縊死瑞昌王者江西藩邸也性耿介每見吉翔國泰所行不端無不面叱廷爭庚子九月

力勸乘晉軍在殺出險地而吉翔國泰固執不可仰天歎曰吾輩死無葬身地矣乃嘔血斗餘遂臥疾至辛丑七月卒張龍者副將也與鄧凱為莫逆交每以直言忤吉翔吉翔銜之晉兵至乃令龍往通龍慷慨赴之吉翔密遣人言于緬曰副將張龍欲構晉藩奪爾緬地緬怒邀于路殺之朱仲者江西宗室也每與吉翔忤約總兵徐鳳翥以麾下士并集數百人欲奉永王殺出與晉藩軍合吉翔不可二人俱忿死初大緬時從陸行不屈死者武岡岷邸皇親馬幾功通政司朱蘊金閣部中軍姜承德俱自縊死李鼎忠建昌李大義范存禮溫如珍總兵劉興隆戴陶張某邊標高陞江右人也千戶謝安祚江西萬安人衛中諸將則忘之矣皆力戰死內臣則劉九皋江國泰劉祁陽段然忠張恭皆被殺者也辛丑十二月初三日緬人差官見永王言你家兵將抵城我國亦欲發兵相送請移近地以便就舟語未竟忽數十人至將永王輿走內聞哭聲震天少頃又有三輿至請太后中宮登餘外男婦步行五里渡河

已昏黑惟聞人馬聲二鼓至營始知我兵初六日至阿哇我師欲
攻阿哇城未遂初九日乃長發至小雲南駐數日鄧凱入帳請曰
今事至此勢不可活乞早決烈使老臣得死所永王曰然第太后
在奈何洪承疇吳三桂世受我家恩恐未必毒害我母子也凱曰
國君死社稷義也脫不害其如祖宗先帝何乃共潛然泣下見凱
繼縷脫衣一襲賜之凱拜受而出三月十三日入滇城至四月
初四日將凱分給鑲黃旗胡章京家凱入大哭不食求死胡曰子
死何益雖然曾作大臣理當如是卽我輩不及亦應云爾以好言
相慰凱三日不沾水米胡令左右皆戒嚴如是者五日不得死胡
乃從容問曰子欲何爲吾當成子之志凱思永王不知作何景狀
且緩死以視其終答曰吾不死卽出家胡曰此乃好事乃送郡南
水德菴披剃爲僧自號也是旣而遷于昆陽之普照寺從永王還
滇者安籠死難閣部吳貞毓子宏猷靖東將軍魏豹子宗皋姜承
德三子鄔昌琦一子鄧居詔義兒鄧玉千戶黎應祥卽王維恭優

人也王祖望家一子潘琪義兒漆相十人而已後凱聞永王死骨
棄于郊乃椎心泣血提筐拾之墟中滇父老子弟相向悲泣軍中
皆感動各贈金錢無算遂葬其骨後足跡不出戶者數十年而卒
外史氏曰古來亡國多矣未有若永王之異也良由奄寺作祟于
內權相奸貪于外雖有謀臣壯士同于贅疣當其在緬時李定國
白文選輩兵力尙強猶可出險也奈何吉翔國泰輩表裏爲奸甚
至聲息不通而永王不能自展一策雖有鄧凱輩二三人又不用
其言以脫虎口君臣夷戮爲天下後世笑可不悲哉

益然和尚傳

汪沐日字扶光歙縣人也性高潔不苟取與讀書再過目輒記憶
年十三補博士弟子員爲文弘深活博邑令愛之憐其貧命請事
以資對曰理直者彼其何請曲者來請則枉法枉法虧吾心而損
公名一舉而負三惡焉某雖窮餓不爲也敢辭令大奇之弱冠舉
癸酉鄉試累上春官不第甲申北都陷福王建國應天沐日遜于

浙乙酉江南定唐王建國于閩起爲金衢副使迨入閩定遂爲僧
名弘濟號益然隱于建寧西山涵比邱中負薪擔水種蔬當竈甘
心卑賤宰相陳名夏薦于

朝詔下直省求不得既而有年家子爲御史按閩巡郡邑會大旱
停車山中命僧人建壇禱雨僧人具表草呈御史覽不中命再草
之又中僧人懼而泣益然聞曰毋泣吾代若爲乃更具一稿進
御史覽之大說曰此非若輩所能必有夫人捉刀者僧以實告
召之見御史驚曰若非江沐日先生耶益然初猶諱以御史素識
卒不能掩御史曰嗟乎先生何自苦乃爾耶今
天子用人不次以先生之材升廟廊坐論天下事何所不可乃若
此哉益然婉謝之卽夜遁入萬山中匿不見後鄉人迎歸黃山道
出廣陵于五月五日沐浴更衣自限死字韻爲詩畢卽死所著有
易解莊通孟子國風諸書行世
外史氏曰昔許由洗耳巢父擊犢蓋視功名如桎梏者矣先生混

迹浮屠闡明易學推其心性恐人知而使爲享祀犧牲耳豈真爲
浮屠哉

三大和尚傳

三大和尚者前朝熊開元倪嘉慶方以智三先生是也開元嘉魚
人天啟乙丑進士令吳有異政百姓至今懷之內遷臺中以直言
廷杖削籍嘉慶句容人崇禎辛未進士官部郎以智桐城人崇禎
庚辰進士官翰林後官內閣國亡俱棄妻子入山爲僧開元號磔
菴嘉慶號嘯峰以智號藥地皆以佛法顯三人時往來吳越粵楚
閒嘗匿山谷中牽袂長號痛哭烈皇帝題詩天臺石壁以寫志藥
菴詩曰一聲長叫涕滂沱地覆天翻可奈何日死月昏山岳倒幽
禽何處覓林柯嘯峰詩曰鼎湖龍去入雲深未得攀髯血染襟不
信蒼蒼因底事竟將大塊湧波沈藥地詩曰臘月狂雷六月霜乾
坤何事反陰陽此閒早晚成滄海不必東洋蹈渺茫三人同登天
都峰聯句云幻雲萬丈湧山阿滿目蒼生溺愛河三十六峰都是

海如何平地不風波其詩甚夥不能悉載然哀怨之深已見乎辭
矣後三人皆出說法其徒得其道者以百數云
外史氏曰三先生皆前朝宰官也國亡義不事二姓遂棄家緇衣
終老讀其詩未嘗不眷眷夫君臣之義也悲夫

槎菴和尚傳

槎菴和尚失其姓名亦不知其何許人或曰前朝宗室也工詩嘗
挂一布袋于胸乞食吳市且吟且乞得稿卽納諸布袋故市人皆
呼爲布袋和尚所爲詩其詞極高其調極哀蓋亡國之音也徧游
海內匡廬衡陽武當天都九子泰岱恆嶽嵩山太華峨嵋雞足以
及閩粵黔越遼海諸名山無不登登則必有詩詩多傷心句讀者
不忍竟竟則必涕下盈盈也能七日不食不飢夏月不用幃帳蚊
蟻亦未嘗啖之冬月不衣絮嚴寒大雪中赤兩足行亦無凍色酒
飲一石亦不醉兩手能各舉千斤飯必斗粟乃飽一日夜能走五
百里卽十日行亦不倦遇同志者輒徹夜談不休能書規文字求

其書者飲一石酒方可否則不願也予之金錢不受嘗放歌于市
其音甚高聞里許每歌一市皆愕然酒酣叱咤萬夫皆辟易後授
詩手山左洙泗閒數年他往竟不知所終

外史氏曰予童子時聞父老言槎菴和尚云云心竊慕其高放及
長徧走天下竟未一遇嗟乎相見之緣何其靳也耶

煎海和尚傳

煎海和尚江陰寶池里人也逸其姓名幼穎異絕倫讀書過目輒
成誦年十三補郡學博士弟子員以文鳴江左妻亦能文章工詩
畫里中有女學士之稱煎海旣壯身長九尺善擊劍閑騎射能舉
八十斤鐵刀輪動如飛于是三吳壯士多從之游乙酉我

朝旣定江南吳越俱下惟江陰以彈丸黑子地城守堅拒煎海卽
率壯士五百人入守臨行其妻自殺曰毋爲君內顧憂旣入大戰
四十五晝夜援兵不至時縣尉閻煌主城命煎海帥五百人突圍
求救所向無敵旣出數其眾少三十人尚被圍城南隅煎海止眾

獨提刀殺入重圍引之出數其眾尚少十人煎海復止眾獨提刀
殺入引之出數其眾尚少三人煎海復殺入引三人出凡三人三
出所向輒披靡無敢當者而五百人無一損也既而城破煎海無
所歸遂為僧率五百人居海島中煮鹽自給號煎海云後天下大
定當事患為亂使使招之煎海與五百人皆自殺
外史氏曰余讀史至田橫故事歎五百人自殺之異也不意數千
年後復有煎海五百人與之追烈噫異哉

越彼和尚傳

越彼和尚張翮字鳧客河南商邱縣明經也與兄孝廉匏客昉俱
以文名中原鳧客幼有至性事父母兄弟最孝友弱冠卽補博士
弟子員及壯以明經薦于朝廷試都人士耳其名多樂與之交為
人言坊行表一步一趨不肯苟且伯仲既貴居鄉未嘗有聲色形
于外恂恂然一故書生也二人嘗我冠博帶行道上儼然人望而
畏之及卽則溫然如坐春風中中原流氛熾二人率其妻子避地

昭陽亂定乃反籍鳧客既歸安其妻孥焚筆研棄巾衫雉染為比
邱自號越彼和尚汎河涉淮渡江抵浙入錢塘靈隱寺參學與凹
凹和尚善凹凹者失其姓氏亦不知何許人但秦音也雖為比丘
不戒酒肉工詩善歌醉則唱一腔忿何時洩一天愁何時撇這刀
頭腥血何時洗盡莫待曉風吹赤句以為樂蓋凹凹本豪貴客工
擊劍善蹴踘故將軍也兩人既契合常同臥起居數年相約同日
死同日果死
外史氏曰越彼篤實君子也其所友凹凹僧殆有異焉惜乎不傳
其姓名也

大錯和尚傳

大錯和尚錢邦芑字開少丹徒縣博士弟子員也博學工文章尙
氣節有田數萬畝僮僕數千人以貴雄于京口歲乙酉我
朝定江南諸郡邑皆下邦芑卽棄家走浙既而浙江定聞唐王稱
帝閩中遂走福州上書數千言甚中肯綮隆武奇其才擢為戶部

主事尋復對策稱旨改授御史累條陳時事不下數十萬言及
王師下閩邦芑聞永王稱帝粵中遂奔粵多所建白授都御史及
王師平粵永王走黔邦芑卽雜染爲僧號大錯常獨汎一小舟飄
泊洞庭湖中讀史漢書竟則反衡嶽每歲八月必一出汎舟讀書
一過乃還如是者二十餘年終于嶽麓臨卒謂其徒曰我亡明大
臣也不得已阨於天而爲僧慎毋以僧禮葬我可以幅巾方袍裹
屍入土吾目乃瞑及卒其徒如命以葬

外史氏曰大錯本諸生耳擁貲財而不享乃欲與上帝爭命甘心
荼苦以終原其心亦可憐矣

幻闍黎傳

幻闍黎陝西人失其姓名咸陽諸生也有膂力隻手能舉千斤善
射工棒擊嘗持鐵棒重二百四十斤舞動如枯葦一枝日行三百
里不憊明末流賊亂秦中幻集壯士八百人大破賊于渭南旣而
又破賊于咸安所向無敵旣而又與賊對壘渭北賊恚甚決渭水

沒其軍幻走盩厔山中將謀復集眾殺賊而長安破矣乃提鐵棒
走中原與諸豪傑結納起義師集數千人隸巡按御史朱明大敗
賊于三水壩及我

朝定鼎平中原幻提鐵棒走保淮南與藩鎮高傑遙聯屬及傑遇
害我師渡河幻知天命已去乃雜染爲僧自稱幻闍黎遂攜鐵棒
入六安山參學又數年楚粵大定乃攜鐵棒入武當茅麓山中求
道又數年攜鐵棒南游粵越吳楚間又數年滇南歸版圖攜鐵棒
入雞足山康熙壬寅歲忽抱鐵棒死點蒼山下旣死手握鐵棒不
可解其徒並舉以葬題其墓曰鐵棒和尚埋骨處

外史氏曰余垂髮時見幻闍黎提鐵棒乞食吳市人莫能舉曰能
舉者卒與之然終未有舉之者去秋游滇始知三十年前已握鐵
棒死大理矣

瞎尊者傳

瞎尊者失其族名廣西梧州人前朝靖藩裔也性耿介不肯俯仰

人時而嘒嘒然磊磊落落高視一切時而岸岸然踽踽涼涼不屑
不潔拒人千里外若將浼之者弱冠卽工書法善畫工詩南越人
得其片紙尺幅寶若照乘然不輕以與人有道之士勿求可致齷
齷兒雖賄百鎰彼閉目掉頭求其晚而一視不可得以故君子則
相愛小人多惡之者雖謗言盈耳勿顧也國亡卽薙染爲比邱名
元濟字石濤號苦瓜又自號曰瞎尊者或問曰師雙眸炯炯何自
稱瞎答曰吾自自異遇阿堵則盲然不若世人了了非瞎而何乃
徧游宇內山川瀟湘洞庭匡廬鍾阜天都太行五岳四瀆無不到
而畫益進書益工嘗曰董北苑以江南眞山水爲稿本固知大塊
自有眞面目在若書法之釵脚漏痕不信然乎其詩益豪嘗與友
人夜飲詩曰憶昔相逢在黃蘗座中有爾談天舌卽今頭白兩成
翁四顧無人冷似鐵攜手大笑菊花叢縱觀書畫江海空燈光晃
夜如白晝酒氣直透兜率宮主人本是再來人每于醉裏見天真
客亦三千堂上客英風竦颯多精神拈秃筆向君笑忽起舞發大

叫大叫一聲天宇寬團團明月空中小又爲友人寫春江圖題曰
書畫非小道世人形似耳出筆混沌開入拙聰明死理盡法無盡
法盡理生矣理法本無傳古人不得已吾寫此紙時心入春江水
江花隨我開江月隨我起把卷坐江樓高呼曰子美一嘯水雲低
圖開幻神髓早得記煎然不喜搖塵尾拖櫛栗呼喝人天作善知
識行徑云

外史氏曰負矯世絕俗之行者多與時不合往往召求全之毀瞎
尊者秉高潔之性又安肯汎汎若水中鳧隨波上下哉宜乎爲世
俗所憎也

杲頭陀傳

杲頭陀字劍菴失其俗姓江陰人性端慤幼孤事母至孝身長八
尺餘力能舉鼎每食粟一斗肉十斤酒一斛家貧力作奉養日以
革帶束腹忍餓以給母嗜學晝則耕夜則讀每達旦不寐三十成
文章工書法下筆數千言立就補邑博士弟子員每試輒奪第一

里中子弟皆豐束脯從學舉子業于是始獲飽飡鼎革後母亡遂
爲僧隱居城南湯武墩參心學得某知識記荊然無叢林氣習風
流瀟灑嘗芒鞋草笠獨步山中拉樵夫牧豎話今古興亡事樵牧
不懂欲謝去杲則牢把其袂必語竟而後釋江邑賦重事煩歷來
縣令二堂出入俱以廣福寺鐘爲度早政聽訟曉鐘動後則出衙
午政催科暮鐘息後則入休否則政多廢墜康熙初年閒寺鐘忽
累夕不鳴令怪之呼詰司鐘僧對曰連夜忽有妖物盤踞鐘樓僧
每登梯則擲石如雨不得上以故失更實非僧過令怒曰若等多
飲醇酒沈醉所致何得以妖物支飾耶管而遣之是夕鐘仍不鳴
明且令復召詰僧泣懇妖狀甚張令益怒限今夕不鳴則置若死
僧懼歸泣告住持住持曰吾聞劍菴大師得道者汝速往求之或
可除也僧遂走告杲曰能擲石拒人者必狐也狐性嗜雞最忌梧
子油可以梧子油炙肥雞置樓下彼聞香味必來取啖啖則必大
吐吐則神散力憊僵臥不能動乃可縛也俟其設誓乞命卽釋之

不可殺殺則羣狐必來索命禍難解矣僧如教果獲一狐黑毛九
尾狐被縛怒曰吾通神狐也吾自得道以來橫行大江南北無敢
撻者至江靖兩邑城郭閒所懼者三人耳若何人斯而敢擒我僧
詰三人爲誰狐曰東郭村學究單城南劍菴和尚杲靖江鄭侯重
三人外吾皆得而侮之僧曰吾奉杲頭陀命汝奈何曰若是吾當
遠避毋爲君子棄也且鄭侯不久卽攝茲邑吾誓不禍汝從此逝
矣僧釋之遂去未幾邑令內遷鄭果署篆僧因其言驗乃走訪所
云村學究者蓋皤然老翁年七十餘矣告之故且詰其生平曰吾
無甚好處但教授五十餘年未嘗一日少怠待生徒貧富無二心
與人交接無欺誑之念而已初邑南境地高不通潮汐田家必藉
山谿暴水始得稔若經旬雨水流不迭則苗腐經旬不雨土壤燥
裂則苗槁多歉少稔農多貧困豐歲皆鶉衣草食杲憫之捐貲募
工鑿溝澮浚溪港建閘啟閉旱則儲水各渠潦則注水入江由是
數里瘠壤皆成膏腴嘗語人曰大丈夫不能致身廊廟爲

國家建不朽功業居一鄉則當爲一鄉立奕世利益若誘愚夫愚婦修齋誦經建廟鑄像爲功德不特有干名教抑且獲罪佛祖大負天地生我之意故雖曾受臨濟衣鉢未嘗踞坐說法操疏募緣也先是順治初歲凶里中富室每患剽竊杲一夕獨立要道候羣盜來遮謂之曰我劍菴和尚也大眾識之乎大眾不過爲飢寒之迫聊以自救所謂夜裏大人是也赤子之心原未絕滅何可久迷不悟今有少贈君輩持歸各理生計毋爲此齷齪事上辱祖宗下羞子孫也盜皆棄仗羅拜曰願奉教乃袖出白金百兩奉之後羣盜悉改行爲良民其徒髡頭陀者字學宗族姓張無錫人也其先累世好善以農桑傳家父某母某尤以篤信稱于鄉鄉人多愛敬之髡性孝友事父母兄弟盡其道年十四母病篤晝夜徬徨榻前飲食不入口者累日顛天泣禱願以身代既死哀毀幾不生居喪痛哭不少休自是事父益謹年十七父疾篤目不交睫者數月嘗冀禱神靡所不至及死廬墓三年哀無虛日服滿卽髡髮爲僧師

事于杲時時以身心性命利濟眾生爲念不事經懺及游學燕京舍于破寺治圃種蔬自食其力暇則拾字紙街頭污穢者必以香水洗潔曝乾火化一日道旁得遺金一函內有券稿乃某爲某稱貸物也髡大喜曰可得歸之矣乃詣失全家合其券盡歸之主人分金以謝不受曰吾苟利此何如不還竟不顧而去初髡脫俗獨廬深山種芋餬口山多猛獸每日暮荷鋤歸豺狼成羣當道直走其前毫無恐意或詰之曰汝何恃而不恐答曰予自幼至長未嘗動一妄念出一妄語仰不愧天俯不忤人何恐之有益深得杲之教也

外史氏曰今之比邱家大抵皆矯言修福誘愚男女建廟鑄像修齋誦經以誑其金錢粟帛而已若杲頭陀以利濟爲心者有幾人哉嗚呼可謂得釋氏之真學者矣

東陵和尚傳

東陵和尚者姓彭氏興化人也其先世居吳門長洲大父某爲興

化學正有德于諸生遂留以家焉父璧庭業儒以文行著母楊氏以淑順稱初璧庭艱于嗣楊禱于大士而舉東陵有異徵父竊喜之幼多病母患之寄名于東寺病終不愈復禱于大士曰兒長願為佛氏子稍長見緇流過其門輒趨出牽袂留至家請母與之齋母喜曰是兒大有佛門根器請其父欲使出家父不許曰吾兒儒家子也將以繼吾書香者烏乎可既而其父亦有金神之夢且憐其多病曰與其歿不能續書香曷若令脫白以延歲乃送里中蘆渡寺依容止長老焉年十五歲在乙酉江南既定我朝布新政海內洶洶于是東陵決志出家越明年受具足戒詣夾山參箬菴有省還家省親時媿母亦脫俗得法事之甚孝久之母命之曰汝既出世當了身心不宜晏安晏安鳩毒也遂詣磬山再參箬菴復有省更參龍池微明年歲二十參牧雲門甚相契又明年入天台靜坐將匝歲有所得往證于報恩琇琇欲授之衣鉢辭曰吾斯之未能信也乃裹糧走深雪中十數日往參天童賢遂得

法奉母子建隆寺乃老名濼字法音東陵是其說法處也
外史氏曰吾聞東陵奉母至孝母年九十餘視之如嬰兒敬之如神明承歡膝下怡怡然有古孝子之風焉如是而為之傳

無知漢傳
無知漢者浙江天台朱氏子也生而穎異數歲即有出世之志性

孝善事父母里人皆稱為孝童父母歿喪畢即薙染為比丘遨遊四方參學諸山得大覺悟洞徹上下古今明晰未來過去乃歸隱嵩巖閉關七載不言不笑無識無知因自號曰無知漢無知漢既得虛無寂滅之深旨乃啞然笑吽然哭浩然長歎曰吾今日乘瞎驢馳峭壁驅土牛捱磨鞭木馬駝經安知不踢翻東海使獅子負犁吸盡西江俾黃犂種豆若是一腳失錯便落萬丈愛河那得乾屎屨變成槃天碧玉柱耶遂破關出就正律牧長老片言投契輒揮肋下三拳打得雪竇含酸忍痛半語合符即斷左肩一臂割得雪庭滴血流紅于是頃刻而呵佛罵祖霎時而拄地撐天呵呵大

笑殺殺從前佛祖俱住惡糞坑中永墮阿鼻地獄誤了三千大千
後生學者乃返故廬依然習靜越明年仲秋忽厭五濁惡世作書
永訣諸方期十月五日死至期自坐龕中合掌而逝無知漢初名
如月得法後改名超月字弘濟
外史氏曰無知漢參學三十餘年未得法於雪竇乃得揭天關掀
地軸掘斷菩提根打破明鏡臺去來自如可謂緇衣之英矣

留溪外傳卷十八

采染素絲五色先推朱紫樂宗大雅八音首尚鐘鏞研詞韻叶蟬
聲不入一夔之譜制義爭長雞坊非修五鳳之樓今

熙朝正當邽隆文風盡稱極盛攻八股者各除軋茁之風屬四韻
者備費推敲之力上探經史下播風詩夫固已簡蠹連車爭爲甲
乙汗牛充棟莫不丹黃矣然俯心舉業止爲控青紆紫之階梯刻
意詩詞無非嘯月吟風之浮采徒自矜爲擊節究何益于迴瀾元
亮之閒情終成猥褻宋玉之神女本屬荒唐雖優孟衣冠依稀楚
相虎賁面目彷彿中郎顧樂府詩餘徒供豔色淫聲之具稗官野
乘僅爲快心鼓掌之談而世道人心毫無干涉民風國政漠不相
關因無匡時濟世之材故鮮善俗宜民之論也吾友陳子定九弱
冠埋頭卽探委宛勝衣奮志旋學陰符卓識深藏旣備元龍湖海
之氣英姿獨稟復擅董狐著作之才天文究慎竈羲和胸羅星斗
地理匯曾楊廖賴目盡山川外而致君澤民經濟必師韓范內而
正心誠意操存取法程朱皆由學盡五車故爾目空一世而且才

堪借箸得五花八陣之神智足運籌極三略六韜之妙奮揆俱備
亶其然乎文武兼優良不誣矣時惟辛未跡寄燕山假館于黃金
臺校書于碧雲閣集成雷溪外傳擬爲申浦藏書東西朔南足歷
者數伯餘邑洋洋纒纒手書者十萬餘言要皆商酌乎教孝教忠
而欲折衷于革心革面振聾發聵非徒以風雅擅長立懦廉頑直
欲以表章自任也漢英術慚解燭室識龍淵鑒遜孫陽安知驥足
第伏處既切金蘭之誼同游又敦車笠之風三復流連不忍釋手
幾回尋繹殊爲賞心蓋險僻之人心志回惑僉王之輩議論猖狂
每言天道無知不足求人言無稽不足惜果報無據不足憑正有
威之斧鑕而不懼震之雷霆而不驚惕之輪迴而不信者而一觀
外集遠凜中藏謂彼真丈夫彼真列女不邀
朝旌憲獎而得千古留芳矣某也姦惡某也刁頑雖漏冥誅法殛
不已萬年遺臭乎由是惕若兢持化其鷹眼翻然悔悟革其狼心
雖官府之所不及褒誅幽冥之所未遑彰輝而片言之袞鉞凜若

春秋一字之譏評儼同月旦風聞數語靡不易轍改絃目覩全篇
俱作書紳佩章雖采薇高節原無俟玉室之褒揚而訪藥孤蹤端
有藉儒門之論讚則是木鐸嚴于三尺風俗自可還淳毛穎切于
五刑民情諒當丕變豈若詩賦之字櫛句比祇作陶情性之端文
章之滑調油腔徒爲弋功名之具也哉欣此宏文特爲編次虞其
湮沒用付梓行欲以質之相知非曰阿其所好也錫山同學弟平
漢英雙河氏撰

暨陽陳子定九幼負異姿垂髫卽潛心理學兼探百家言束髮便
成通儒其尊公尚卿先生嘗挈之過吾錫會講東林故得與家君
游先祖學憲公一見卽器重之余幼同友人平子雙河應童子試
造其居時尊公先生年已七十端方古道儼然三代上人物也乃
敦世好畱榻山中亡晝夜徘徊登眺見雷溪帶水盈盈環繞戶外
平疇萬頃碧嶂千重後倚盤龍岡透迤曲屈蜿蜒江干幾十里恍
如南陽風景也俛仰之間不覺心曠神怡身世俱忘因而分韻賦



詩以紀其事嗣後陳子卽遠游黔楚滇閩粵越閒歷覽山川名勝
足跡半天下南北參商音問隔絕垂二十載今秋余因應薦來都
始得聚首于王吳廬先生齋頭握手言歡追溯曩時忽忽若前日
事感慨久之出其畱溪外傳見示闡幽表微字字謹嚴大得紫陽
綱目之旨其維持世道人心功良鉅矣乃與平子編次較閱付之
剞劂以公同志庶乎名教之一助也竈僅取其辭華而已哉梁溪
同學世弟高大西涵三撰

澄江陳定九先生少穎異于學無所不博年十五游于黔黔歸游
于閩旣而往來粵楚齊魯燕趙閒其見聞所及無論爲釋爲道爲
奴隸爲乞匄凡有關於綱常倫紀之日者一一筆之于書命曰畱
溪外傳閱其彙行篋中凡百有十八篇丹黃塗乙久而未定壬申
襄與先生同客京師乃得讀之三晝夜始竟不覺喟然歎曰是書
也非養之有素而出之有本者不能也然竊疑之以先生如此其
才何難得志有司以時文名世乃奔走道途遑遑焉于山澤憔悴

之士獨慮其久而湮沒無聞力爲之表章恐後使先生今日登金
門上玉堂敷歷中外其思所以仰補

聖明之治者又當何如也且足跡半天下未聞其挾刺以干士大
夫則先生爲人于此可想見矣襄與先生垂髫交也旣壯各奔走
四方越二十年而得聚首于三千里外噫天下大矣天下有志之
士阨于時而有世道人心之責如先生者襄又安能盡交其人而
盡親炙其人也哉感而書于畱溪外傳之末時康熙壬申冬至月
錫山同里晚生朱襄頓首再拜書于燕臺精舍





百
拾
夕
傳
戶
辰

三



